

東
華
續
錄

東華續錄

同治九十

臣王先謙敬編

臣張式恭恭校

夏四月庚申朔諭軍機大臣等文煜等奏第六號輪船開上第七號改造兵船情形一摺另片奏船政大臣因病不能赴工請旨遵行等語閩省第六號輪船見已購齊木料剋日開工卽著照文煜等所擬命名鎮海至輪船之設須礮位多而馬力大方能利涉波濤制勝較有把握文煜等擬將第七號改造兵船不爲無見著卽督飭在事人員與日意格悉心講求功歸實際不得曠日持久虛糜帑金沈葆楨辦理船政成效彰彰見雖病未就痊仍未可置身事外著文煜等督飭夏獻綸等認真妥辦並令該道等隨時稟商沈葆楨以昭慎重沈葆楨俟服闋後再行赴工督率經理此係朝

廷曲體孝思俯允所請該前撫母再因病固辭以副委任將此各諭令知之○癸亥諭軍機大臣等劉銘傳奏派軍填紮寶雞一摺據奏唐定奎一軍已由華陰拔隊馳赴寶雞分軍駐紮隴州鳳縣等語著劉銘傳飭令實力嚴防遇賊卽擊毋稍疏懈甘省秦州一帶與寶雞等處接壤該處情形若何刻下有無賊蹤范銘所部叛勇雖已收降有無餘匪滋事金積堡克復後降眾是否安置妥協抑尙有餘匪竄併河州劉銘傳如探有確實情形隨時奏聞北山一帶伏莽未清該提督仍當派隊搜捕以靖地方並分飭所部各營將弁隨時認真操練毋任勇丁稍滋事端另片奏丁憂提督請俟撤防後終制等語提督唐定奎膝學義均著暫行畱營俟陝西撤防後准其回籍補行終制將此由四百里諭令知之○丙寅諭內閣本日劉崐奏遵保攻克松柏洞苗巢及克復鎮遠等城出力

人員開單請獎並另片聲明摺片單正繕齊拜發開據營官戈鑑稟稱總兵陳大才等五員或撤遣出營或見已身故應將該五員此次保案刪除惟陳大才等業已列入清單請獎一經刪除全單卽應另繕未便因此數人致稽全案請將陳大才等保舉撤銷等語除陳大才等業經扣除外惟臣工陳奏事件宜如何小心敬慎乃劉崐於保舉清單竟因業經繕就憚於更換奏請於降旨時代爲撤銷實屬不成事體劉崐著交部議處○諭軍機大臣等劉崐奏援黔官軍疊破苗寨進規凱里一摺苗匪盤踞高坡雞擺尾等處經席寶田派軍進剿先將南瓦台盤兩寨攻克逆酋金大五撲犯鎮安當經擊退旋將高坡雞擺尾一帶賊寨剿平其甕谷隴賊巢亦一律埽除辦理尙屬得手所有此次出力人員著准其附入克復台拱案內彙請獎敘席寶田見撥派兵會剿加巴牛場並分

軍擇要駐紮通清江台拱之氣扼丹江古州之要自率大軍由排
羊排雜前進著劉岷飭令乘此聲威力圖進取務將丹江以東賊
寨悉數蕩平由凱里等處節節進剿以期戡定苗疆將此由六百
里諭令知之○添設江蘇堰圩同知駐長隄改揚州府總捕同知
爲河務同知○以湖南官軍收復貴州新城巖門司等城出力賞
總兵官席啟昭于高勝正一品封典餘加銜升敘有差○以湖南
官軍收復貴州鎮遠施秉等城出力賞提督曹復勝等三代一品
封典餘加銜升敘有差○予貴州陣亡參將陳永楨等祭葬世職
○己巳諭軍機大臣等金順奏回匪被剿求撫見籌妥辦一招通
貴餘匪遁入納家牯後冀與納萬郭等匪黨伺隙逃竄疊被官軍
攔擊無路可逃擒斬首夥多名敗匪潰奔入寨窮蹙求降金順會
商張曜勒令此起回眾盡繳馬械平毀寨牆若能悔罪輸誠將藏

匿器械繳清聽受約束卽著該署將軍等分別妥爲安插予以自新儻敢怙惡不悛心懷疑貳仍卽督兵痛剿毋畱餘孽甯靈西岸回務金順與張曜會商辦理總當分別良莠相機勦撫不可草率了事其投出靈州回民二百餘名金順已遣令東渡由該地方官收管安插著左宗棠飭令劉錦棠黃鼎遇此項回民抵籍卽札行該管地方官隨時籍束妥籌安置毋令失所免致滋生事端金積堡攻復後左宗棠究從何路移營作何布置河狄匪勢若何如何設法進剿該大臣自應統籌全局將賊匪次第蕩平何以日久尙未奏及殊深塵繫著卽將籌辦情形據實具奏不得稍涉遲回致負委任前據福濟等奏拏獲賊探成娃子係甘肅平番縣人寄居肅州據供同治八年楊軍門與回回講和上年八月內回匪十人持楊軍門票出來貿易隨後出來五百人又有穆姓二人持楊軍

門印票赴將軍公旗下貿易後跟賊三百多人等語所稱楊軍門是否卽楊占鼐有無此等情事著左宗棠查明具奏將此由五百里各諭令知之○予甘肅陣亡遊擊尙清蘭祭葬世職○辛未

上詣 大高殿祈雨○諭軍機大臣等成祿奏頭起官軍分紮關外並籌辦後路情形一招成祿所派頭起出關兵勇分紮敦煌二營玉門一營去冬已抵防所見在關外附近地方是否安靖著成祿飭令遊擊李天和等與安西玉門原駐各軍聯絡聲勢互爲應援以資防剿上年竄擾甘郡之賊於十一月初間折回東去而自山丹至鎮番一帶賊蹤出沒無常道路不通且西甯之賊常赴北套擄糧是蘭州以西賊勢仍形滋蔓左宗棠務當統籌全局一面進兵河狄一面派軍由西路繞截毋令賊匪向甘涼遠竄致追剿又形棘手上年賊匪闖入山丹圍攻甘郡楊占鼐擁兵自衛閉關

株守以致城外地方悉遭蹂躪著左宗棠將該提督貽誤情形查明具奏成祿見在駐紮高臺著卽督率兵勇認真訓練遇有賊蹤竄近隨時實力堵剿毋稍疏懈吉林黑龍江官兵見在無可調撥該提督當就見有兵力相機布置另片奏署高臺縣知縣秦惠鈞因奉委赴肅州查辦事件行至南山馬營岡地方遇賊被害殊堪憫惻著交部照例議卹並著左宗棠遴員接署高臺以重地方此股匪徒究從何處竄至見又竄往何處著一併查明具奏將此由六百里各諭令知之○甲戌諭軍機大臣等吳棠奏派隊赴黔畱兵以守川邊並簡練綠營情形各一摺前因曾璧光等奏黔省兵力不敷當照所請調李輝武一軍前往助剿茲據吳棠奏該軍扼守漢南三載以來邊境賴以稍安著全行撤去難資緩急請畱二營駐紮陝甘交界之大安驛以固川邊其餘三營仍令赴黔等語

所奏自爲兼顧蜀境起見卽著照所擬辦理至所稱調往之三營先給兩箇月餉銀解交李輝武料簡啟行並請將以前欠餉仍由川省酌補以後月餉卽歸周達武於各省協餉內均勻撥放等語該軍向食川餉無論在陝在黔於川省同一支應並未額外添餉且黔省兵餉正苦不足若令李輝武所部由該省勻撥月餉勢必愈形支絀著吳棠仍遵前旨將該軍月餉照常籌解不得意存推諉並著飭令李輝武統帶所部三營迅速啟程曾璧光周達武侯該軍到黔後卽行酌量添募歸併統帶藉資調遣其陝南一帶已據劉銘傳蔣志章先後奏報調派唐定奎等營分紮寶雞等處仍著飭令在防各軍與川省所畱兩營聯絡聲勢嚴密扼守以固邊防川省綠營旣據吳棠奏稱簡練整頓可得精兵九千餘人仍著隨時勤加訓練悉成勁旅不得徒託空言有名無實將此由五百

里諭知吳棠蔣志章曾璧光劉銘傳並傳諭周達武知之○諭文麟等奏安集延回酋遞送榴子烏城逆回投順安集延逆首馬仲由烏城遞稟乞撫各一摺安集延帕夏圍攻番城勦敗回匪該帕夏果爲國出力何以呈遞榴子內並無投誠交城之語且將該城漢民概令薙髮發往南路不知安插何地該帕夏見在城外安營挖濠派撥纏頭看守城垣其爲希圖占踞地方顯而易見且偏令烏城逆回投順並將馬仲放給迪化總頭目寶屬包藏禍心文麟等見擬設法羈縻給予諭帖飭令投誠交城亦不能不權宜辦理但須慎之又慎嚴密防維不可稍涉大意致爲該帕夏所紿參將白世泰回營後卽將所探安集延及烏城確實情形迅速具奏勇目徐學功等所帶練勇各衛身家不肯從賊洵堪嘉尙自應收畱拊循以固眾心卽著照文麟等所籌妥爲辦理該辦事大臣等見

令孔才帶領馬隊馳赴西路收復奇台等處卽著飭令統率所部迅圖攻拔並密探吐魯番軍情豫籌防範文麟等給該帕夏諭帖內有擬據情奏請破格施恩將帕夏從優獎勵一俟欽奉諭旨卽送交帕夏恭閱等語而摺內於此節如何辦法並未聲敘著文麟等將辦理情形妥爲籌畫仍一面奏聞索煥章病故是否確實帕夏是否安集延回酋名目抑係人名著一併具奏文麟等續報馬仲具稟投誠見令烏仁泰等傳諭馬仲會同妥得璘及頭目等同赴孔才營中帶領來哈等語馬仲果真心投誠自可因勢利導酌量辦理若觀望不前卽屬心懷叵測不可輕率議撫委員等稟詞亦未可輕信務須妥慎籌辦成祿當靜聽文麟等悉心會商毋得冒昧從事致涉兩歧將此由六百里各諭令知之○署廣西巡撫廣東巡撫李福泰卒予祭葬○以劉長佑爲廣東巡撫

已革直隸總督未

到任前仍以兩廣總督瑞麟兼署○以康國器暫護廣西巡撫○
乙亥左宗棠奏臣前因安定會甯時有回逆零騎竄越滋擾檄飭
該處附近防營隨時搜剿以靖地方正月二十四日督帶平江左
右兩營總兵蕭賞謙率隊出向會甯一帶搜剿行五十里至老河
溝遇賊馬三百餘騎蕭賞謙揮隊衝擊適分駐康家堡華家堡哨
隊繼至敗之賊由馬營東北向通渭大路竄走旋分而爲兩一踞
該縣後川鋪旋竄鋪路鎮一竄城西北三十里之坡兒川瓦房堡
一帶旋竄城東北四十里之黃家窯擾及秦安清水各縣界適提
督楊世俊剿平岷州潰卒周開錫檄令赴秦州秦安適中之石佛
鎮駐紮訶知清水界內有另股賊竄秦州街子口立飭所部馬隊
馳往截剿並函會駐紮洛門鎮之提督張仲春截賊由鹽關西竄
之路張仲春二月十一日得報後訶知賊竄四門寨東四十里之

廖家莊十二日黎明自率宗岳禮營及副白旗馬隊馳抵廖家莊賊鼾睡未起官軍四面圍擊賊驚覺死拒官軍槍轟矛刺斬馘殆盡訊據擒賊供稱此股頭目張運隆係河回僞領員正月十三日由河州竄出見在張運隆已斃於陣楊世俊又詢有另股分踞秦安縣北魏家莊王家鋪一帶復調各旗馬隊北趨任當川扼賊東竄並添調黃白旗四成隊合力圖之十一日遇賊於任當川賊瞥見官軍向西飛遁官軍窮追三十里天曉露宿十二日五鼓追及李家店偵賊熟睡弛備官軍急起掩之斃賊二百餘名生擒三十餘名餘賊負創狂奔官軍躡追至靜甯柏子岔沿途擒斬甚多十三日黎明追至馬家岔復痛勦之餘逆鮮有脫者收隊後查點官軍僅陣亡勇丁二名受傷九名訊據擒賊供稱賊首沙母驢子馬原四等由河州北莊三甲集竄出見斃於陣餘賊七八十名狂竄

西河禮縣界復經提督蘇家良丁桂智縱馬追斬無遺此次河州馬步各賊共計不過千餘由安定分竄通渭秦安清水秦州西河禮縣各界颺忽狎至旋轉如風經各軍迎頭截尾殲除殆盡地方幸免蹂躪無誤春耕其另股回匪由成縣竄階州白馬關卡者代理州判烏克松阿力不能制二月二十九日竄及階州南路太石山守卡都司李宏珍擊敗之賊折竄黃鹿山管帶楚勇署階州知州洪惟喜派副將鄧光耀率所部馳扼羅家堰派副將彭德沅遊擊王斌武守備周正秋率所部緊躡賊後遊擊李廣全率親兵團練扼紮大水壩遊擊胡彪率親兵中哨扼紮小關嶺嚴陣以待賊竄黃鹿山團丁列隊兩旁巖谷彭德沅王斌武周正秋率隊擊之槍矛並舉斃悍賊三十餘名賊竄向大水壩李廣全擊敗之三月初一日賊折由瓦房出竄彭德沅擊卻之復折竄羅家堰初二日

鄧光耀擊之斃悍賊十餘名賊翻山紛竄追至小關嶺胡彪率所部迎擊之斃悍賊十餘名敗賊向禮縣雷家壩一路遁逸臣查河州逆回從前無事時卽多騎馬遠出肆行劫掠之案與撒拉及米喇各回性情相似自甘南各軍復狄道憑洮設守屏蔽稍寬賊復從下游安定一帶繞道南犯蓋因官軍方勦潰卒妄冀有隙可乘也此次竄賊雖不過千餘然分支狂騁頗爲剽悍見官軍至輒望塵先遁瞬息無蹤幸岷州事定官軍扼要分駐地網四張卒亦無能善脫見在地方安謐臣已調提督銜前臺灣鎮總兵劉明燈帶所部馬步八營進駐馬營監以向安定徐文秀撥所部四營由靜甯州延紮會甯一面修治蘭州中大道以利輓運一面轉般軍糧子藥儲存靜甯州城以規進取蓋地荒已久人煙稀絕籌措艱難不得不次第爲之而進軍必先清後路通餉道又一定之局也

上諭軍機大臣等左宗棠奏南路官軍截剿竄匪獲勝見調劉明燈所部八營進紮馬營監以向定安徐文秀撥所部四營由靜甯州延紮會甯並挽運軍糧以規進取著卽妥籌布置剋日進兵以期節節掃蕩前據左宗棠奏稱撫回李德昌求赴河州曉諭近日該處情形究竟若何該大臣務當相度機宜速籌攻剿斷不可任其觀望遲回致墮緩兵之計金積堡收復後北路有無餘孽潛藏應否畱兵駐紮並如何調派各營分投西進之處均著詳悉奏聞將此由五百里諭令知之○廣廣東連山連州歸善陸豐德慶開平鶴山恩平花縣饒平十廳州縣文武學額各二名○飭各省速解西征協餉○丙子大學士倭仁以病乞罷予假調理賜人蔭○丁丑諭軍機大臣等定安奏撥隊填紮纏金騰出馬隊西進謹陳籌辦情形一摺前因定安軍營馬步各隊陸續撤回諭令該將軍

於金運昌所部到營後安籌調派以便騰出薩薩布馬隊赴烏援
勦茲據定安奏稱甯夏平羅一帶漸次肅清無須添兵助勦惟靈
州等處需兵駐守見令金運昌督飭全軍仍紮靈州以資鎮攝其
纏金地方已飭劉廷於所部五營內先行抽撥一營就近趕赴纏
金駐紮騰出薩薩布馬隊剋日啟程等語所籌均尙周密卽著定
安妥爲辦理毋誤事機至薩薩布各起馬步官兵一千二百餘員
名定安前議擬令取道烏喇特旗徑赴烏城見因查探該旗荒沙
戈壁並無人煙村落駝馬雇覓維艱軍行不易擬仍由歸化城赴
十八臺歸軍臺大路行走亦是正辦卽著定安傳知薩薩布督隊
暫紮茂明安等旗境內相機進發文盛前奏宣化官兵全數出口
大同官兵約於四月二十四日亦可走畢其續調直隸一軍卽令
接續啟行等語仍著文盛妥爲應付催令依次前進一俟各軍全

行出口卽知照定安督催薩薩布一軍接踵西行毋稍遲誤將此
由四百里各諭令知之○己卯諭軍機大臣等穆圖善豫師奏擊
退平番竄匪會商布置情形一摺甘肅平番縣境於本年二月間
有肅州投誠陝回一千數百名由成祿派員護送前往米拉溝據
原解委員聲稱定期十日仍由米拉溝折回赴肅乃逾期仍未折
回忽報米拉溝有陝賊多人四出殺掠復於金家泉等處滋擾先
後經豫師派兵擊勦斃匪甚多該匪見已分竄入山卽著豫師飭
令派出各營分投搜捕認真扼堵務將此股賊匪悉數殲除平番
防勇無多並著左宗棠穆圖善抽調勁旅協同防勦以資厚集原
赴米拉溝陝回尙未折回見在滋事之匪是否卽係此項回眾且
該陝回等見須在肅安插何以先送至米拉溝旣須由米拉溝折
回肅州何以原解委員又不在平番守候其辦理詳細情形何以

不先期知照穆圖善等著成祿據實奏聞並一面妥爲辦理毋令貽害地方甘涼一帶該將軍等已飭楊占鼇王仁和一體防範卽著隨時檄令該提督等認真扼守不可稍涉疏虞礮伯一帶賊股亦當檄令巴札果莽等處團勇合力兜捕保衛地方將此由五百里各諭令知之○庚辰諭軍機大臣等劉嶽昭岑毓英奏剿退川省蠻匪疏通關井餉道見飭籌辦江防一摺四川蠻匪自襲踞求甬堡後分竄雲南之大關永善各地方阻塞關井餉道經劉嶽昭等飭令總兵李家福等派副將劉奇義遊擊曹世貴各軍分赴大關永善迎擊斬馘甚夥大關之賊退竄筠連宜賓邊境川軍迎頭截擊復經滇軍尾追殲滅殆盡永善官軍攻克求甬堡並復蔣家沱等處碉卡境內肅清餉道均已疏通剿辦尙屬得手惟蠻性出沒無定亟應整頓江防以杜回竄著劉嶽昭岑毓英督飭李家福

等嚴飭沿江文武修築礮卡置備戰具並檄劉奇義率勇嚴扼隘口會同原設兵練實力梭巡毋得稍有疏虞其疏防之署昭通鎮右營遊擊譚美著暫行革職畱營以觀後效見在滇省東南各屬次第底定迤西大理一帶賊勢如何亟宜乘機規復應由何路進兵之處並著該督撫悉心妥籌辦理迅速具奏將此由五百里各諭令知之○辛巳 上復詣 大高殿祈雨○諭內閣大學士倭仁學術純正志慮忠誠受 先朝知遇之隆由翰林游躋卿貳特恩命直上書房旋授盛京侍郎均能恪恭盡職朕御極之初蒙兩宮 皇太后簡用耆碩擢任正卿旋晉綸扉並命在弘德殿授讀朝夕納誨於茲十年深資啟沃前因患病屢請開缺疊經賞假並賞給人蔭以資調攝遽聞溘逝悼惜良深披覽遺章於修齊治平之道敷陳剴切語不及私閱之尤深悽愴著賞給陀羅經被派

貝勒奕劻帶領侍衛十員卽日前往奠醑加恩晉贈太保照大學士例賜卹入祀賢良祠任內一切處分悉予開復應得卹典該衙門察例具奏伊子廣東候補同知福綸著俟服闋後以同知畱於該省卽補理藩院員外郎福裕著俟服闋後以該衙門郎中補用伊孫戶部候補員外郎衡峻著以本部員外郎卽補衡瑞著賞給舉人准其一體會試衡齡著賞給主事衡珊著賞給內閣中書用示篤念耆臣至意尋予祭葬謚文端○壬午諭軍機大臣等成祿奏瀝陳軍務掣肘並辦理撫回情形各摺片前因成祿駐軍高臺諭令左宗棠妥籌兼顧茲據該提督奏稱糧餉兩絀情形萬緊駐師日久事勢更難支持等語成祿一軍疊諭汰弱畱強以資得力不必紛紛招募徒耗餉需惟非左宗棠隨時兼顧恐致貽誤事機著左宗棠統籌全局遇有該提督咨商一切機宜應行應止務當

悉心會商妥爲經畫庶免該提督無所適從至左宗棠新定章程
出差員弁均各發給盤川不准地方官支應自是正辦而成祿軍
營餉精缺乏所派委員不能優給川資亦係實在情形若非速籌
接濟不但飢軍難以久持卽一切用款亦屬不敷支發著戶部查
明成祿協餉咨催各該省督撫迅速籌解毋任缺乏以濟要需投
誠陝回據成祿聲稱尙非虛僞該提督務當隨時察看妥爲防範
不可爲其所給將此由四百里各諭令知之○甲申賜梁耀樞三
百二十三人進士及第出身有差○諭軍機大臣等李鴻章奏查
閱海口礮臺見籌布置情形等語大沽海口南北兩岸礮臺日就
傾壞李鴻章見令副將羅榮光督率兵夫擇要興築先將營壘加
挑堅厚添築夾牆並擬於礮臺前架築護臺復於牆外添築闌潮
土壩一道以免潮汐侵刷又將蘇局舊存炸礮及江甯礮局製成

洋礮陸續運津並委員添購西洋新式巨礮數尊以備更換操習所籌均係未雨綢繆至計卽著該督妥爲經理行之以漸持之以恆務令海疆要地屹若長城方爲不負委任至北塘與大沽犄角關繫緊要李鴻章已調周得勝帶遵化練軍一千名移紮北塘卽著飭令該總兵實力操防將應設礮臺次第修整俾壯聲威其各該處應需經費並著該督悉心籌畫期收得寸得尺之效不可畏難中輟致廢遠謀將此諭令知之○諭張廷岳等妥辦庫倫防務○乙酉諭內閣前因錦丕勒多爾濟奏參福濟謬妄貽誤各款當經諭令奎昌馳赴烏里雅蘇台會同榮全查明具奏茲據奎昌榮全奏稱上年賊陷烏城福濟遇救得生是否與賊同居此時無從質訊至以倉庫酬賊係得自傳聞亦無確據其奏報賊名係據難民稱述所殺蒙民均係乘機搶奪匪徒並非置之不理至被擾地

方事前既令蒙古各盟固守藩籬事後又調內地大兵會合防剿
尙非膜視不恤惟厄魯特人眾搶擄牲畜一節實有其事因烏城
旋陷未及究辦至改調察哈爾馬隊上年七八月間福濟因賊已
遠颺咨令暫在賽爾烏蘇一帶聽候調遣並未止令歸伍各等語
福濟被參各節雖查無實據惟身膺邊寄不能振作有爲力圖報
稱實屬有負委任該將軍前經革職畱任著卽行革任以示懲儆
錦丕勒多爾濟與福濟同辦一事不能和衷共濟迨債事後輒思
諉過於人已屬非是本日復與福濟奎昌榮全聯銜奏請以該參
贊能得眾心爲詞擬卽馳歸遊牧尤屬謬妄錦丕勒多爾濟著卽
開參贊大臣之缺交理藩院嚴加議處至福濟被參案內馬兵常
安子需索羊隻一節仍著奎昌榮全查明定擬具奏○丙戌諭軍
機大臣等張廷岳等奏請飭催帶兵大員乘時進剿籌撥烏城駝

馬等項嗣後無力再籌探明匪擾地方張樹聲奏遵派將弁隨軍
赴科各摺片本年三月間回匪突犯賽因諾顏部落公阿畢爾米
特旗所屬諾彥山一帶住戶多被搶掠四月初一日竄至固爾班
賽汗等處焚掠並有四出竄擾之信見在該逆究竄何處著杜嘎
爾統帶馬隊探明賊蹤迅速進剿毋任蔓延奎昌榮全張廷岳阿
爾塔什達務當各飭防兵嚴密堵禦力扼該逆竄突之路刻下關
外大兵雲集時交夏令正可乘時進剿若徒久駐防所坐待賊至
轉瞬又屆秋冬冰雪在地將士苦寒剿辦愈形棘手糜餉老師何
日方能蒞事耶著杜嘎爾會商奎昌榮全張廷岳阿爾塔什達探
明何路有賊卽由何路進剿以期迅速蒞事不得遷延時日坐耗
餉需如杜嘎爾兵力尙單卽咨商張廷岳阿爾塔什達抽調庫倫
防兵協助該逆一經大軍痛剿難保不沿邊回竄著定安金順張

曜於沿邊一帶先事籌防以杜奔突宣化大同官兵均已啟程著
文盛僅令星速遄行趨程前進以赴戎機昨據李鴻章奏續派古
北口統兵一千名如烏庫兩城有警再行調兵出口茲據張廷岳
等奏回逆出竄請飭催續調官兵到防著李鴻章仍將續派古北
口練兵一千名妥爲整備剋日啟程赴庫以資厚集烏里雅蘇台
將軍等以各軍咸集需用駝馬等項咨令庫屬圖車兩盟協同籌
備張廷岳等見已飭該兩盟將烏城指調駝馬氈帳等項無論足
數與否竭力籌辦解交烏城應用惟圖車兩盟供用已極苦累亦
係實在情形嗣後所需一切著奎昌榮全就近札飭所屬西兩部
落未經被擾各旗設法辦理宣化大同官兵所需軍糧極關緊要
著李鴻章張樹聲懍遵前旨妥籌應付不得稍有貽誤派往科城
之桓昌等八員張樹聲卽飭迅速前進烏里雅蘇台參贊大臣本

日已簡放多布沁札木楚該參贊卽迅速啟程前赴新任會同奎昌榮全將一切應辦事宜實心辦理並將臺站事宜竭力整頓以副委任將此由六百里諭知李鴻章定安金順奎昌榮全多布沁札木楚文盛杜嘎爾張廷岳阿爾塔什達並傳諭張樹聲張曜知之○戊子諭內閣宗人府等衙門奏拏獲毆斃職官人犯供係親王主令謹將咨取親供奏明請旨遵辦一摺主事福珣被扎身死一案據要犯已革三等護衛玉壽供有伊主鄭親王主使情事經該衙門行令鄭親王承志逐一登覆該親王兩次投遞親供反覆辯論而玉壽堅執前供矢口不移案關親王主使糾毆致斃人命虛實均應徹底根究著宗人府傳令鄭親王承志到案質訊並著派軍機大臣會同宗人府刑部詳細研鞫定擬具奏

五月庚寅朔雨 上詣 大高殿報謝○諭軍機大臣等前因金

積堡克復後，經諭令左宗棠將如何移營進剿之處妥籌布置。近聞河州回股於四月初間竄擾兩當徽縣一帶，旋向西去十六日，隆德縣知縣周其俊會同馬隊遇賊於馬厰野雞峴地方接仗，陣亡隆德固原一帶匪蹤出沒無定，兼之叛回馬彥瀧黨眾四百餘騎潛伏其間，並聞另股回匪在秦州西六十里鋪剽劫攻破管子鎮以南民堡一處，經官軍追擊於初八日至禮縣所屬長道鎮地方接仗，挫敗十四日，又有回匪千餘騎竄擾娘娘壩高橋延擾牡丹園等處，秦州北鄉鹽合城地方亦有賊蹤紛竄。此股回匪約有三千餘眾，由河州潛渡洮河，長驅東下，見在盤踞甯遠縣屬之馬塢新寺一帶，分股四出以擾後路糧道。似此情形，賊勢甚爲猖獗。著左宗棠將近日軍情確切查明具奏，前據奏稱調派劉明燈等所部分向安定靜甯等處挽運軍糧以規進取，諒該大臣必已

全局在胸速籌辦理第恐所部將士或因金積既克北路狃定遽爾志驕意滿漸形懈弛甚至觀望遷延不遵調遣此等軍營惡習亦難保其必無見在河州賊勢方張正當激勵諸軍鼓行而西滅此朝食斷不可翫時愒日坐失事機仍著將如何籌辦情形迅速奏聞以慰虛念將此由五百里諭令知之○諭杜嘎爾奏逆匪向東侵犯見籌防勦情形請催調承辦糧臺官員迅速出口各摺片逆匪有赴翁音河哈爾尼敦附近之薩巴爾圖河推河等處東竄之信另股距庫倫翁音站僅七八日路程四月初間該逆分股在公阿畢爾米特游牧之白心圖西樵圖各寺盤踞杜嘎爾見飭管帶吉林二起馬隊之訥蘇肯等前赴翁音驛駐紮著卽飭令嚴密設防一面偵賊所向實力進勦迅掃逆氛逆匪見既擾及公阿畢爾米特境內勢將侵犯東南亟應通力合作會籌掃蕩著定安金

順奎昌榮全多布沁札木楚文盛張廷岳阿爾塔什達一併偵探賊情妥籌備豫務期各路聲息相通爲一鼓聚殲之計杜嘎爾統兵進剿需用駝馬甚殷著奎昌榮全多布沁札木楚張廷岳阿爾塔什達將備調駝馬趕緊備齊解交杜嘎爾營中應用杜嘎爾當懷遵前旨探明何路有賊星馳剿辦不得頓兵不進日久無功烏城餉銀三十萬兩業經杜嘎爾飭令貢果爾等擇地存儲看守仍著妥爲照料不可稍有疏虞所稱此項餉銀須有承辦官員專司開放等語著卽咨商金順奎昌榮全多布沁札木楚文盛等妥籌辦理將此由六百里各諭令知之○壬辰諭軍機大臣等郭柏蔭奏會匪滋事陷城見籌防剿一摺湖南會匪糾黨豎旗裹脅焚掠於四月十二日攻破益陽縣城十六日復陷龍陽縣郭柏蔭見飭總兵彭昌禧派撥師船前赴澧州防守並飭黃中元暨荆宜水師

稽查偵探商令郭松林酌帶所部駐紮荊州布置尙爲周妥惟楚鄂會匪實繁有徒恐其到處勾通暗中響應必須乘其初起就地殲除方免蔓延爲患賊氛漸偪常德近接鄂疆李瀚章郭柏蔭務當嚴飭派出各營實力堵遏毋令匪蹤侵軼荊州地方緊要並著會商郭松林嚴密布置扼要設防常郡兵力甚單如該處情形喫緊該提督自應越境進兵協力助剿但須兼顧荊州防務不得稍有疏虞是在該督等酌度事機妥籌進止鄂省兵力見在不敷分布陝西軍務漸鬆所有譚仁芳仁勝楚軍卽著蔣志章檄令統帶回鄂交李瀚章郭柏蔭調遣譚仁芳所部啟程後著劉銘傳酌量撥隊填紮湖南會匪見又起事攻陷城池勢已猖獗劉峴何以並未奏及匪徒究有若干是否去歲湘潭滋事餘黨見在如何派兵進剿著卽悉心籌畫迅速據實奏聞此股賊匪若剿辦稍遲則裹

荷日眾該撫務當振刷精神會商李明惠督兵進剿迅將兩城克復盡殄逆氛不得再事因循致干重咎其附近各州縣尤當嚴檄該地方官設法彈壓消患未萌毋任再滋事端致辦理愈形棘手曾國荃是否尙在省城著劉崐傳知該前撫酌募舊部協同李明惠盡力剿賊綏靖地方曾國荃於剿賊機宜確有把握且誼關桑梓諒必能妥速會辦剋期蒞事也將此由六百里各諭令知之○甲午允英翰奏裁皖省防兵以節餉需○乙未左宗棠奏回民以西戎族類雜居中土自古已然載籍詳矣就回民自數之典言之祖曰阿丹生於天方之野產七十二胎每胎男一女一自爲夫婦至囑撒而其教始興又六百年當隋開皇中有穆罕默德者生而神靈闡明清真之教回眾翕然從之其教始盛今回民稱天方教自稱曰穆民以尊穆罕默德故也又曰膜民以阿丹初生之祖言

也其書有天經一部回族稱爲穆罕默德所受之天者又天方性理天方經典兩部則明代金陵回人劉智所撰皆發揮天經遺意以華人文字潤色之其教以識主爲宗旨似儒者所言明心見性以敬事爲工夫似儒者所言制外養中其教規所謂天道者五一日唸謂誦經一日禮謂報恩一日齋謂絕物一日課謂忘己一日朝謂歸真所謂人事者五謂倫常之理七日一禮拜亦與泰西各國同蓋其原本出於天主耶蘇而時雜以佛民之說稱華人爲大教自稱小教非如奇袤詭異之流專以句結爲事煽誘爲能也是故雜處中國千數百年婚姻未通俗尙各別傳習不同而未嘗敢萌他志歷代任其翔泳於區宇之內譏禁無聞我朝錄其人才准其仕進回族由文武科甲得官擢至督撫提鎮者亦不乏人固未嘗以其遊於中國而外之也乾隆年間兩江督撫臣奏回教不宜

畱於中國 高宗純皇帝特加訓飭 聖謨洋洋足爲百世法矣
乾隆四十六年逆回馬明心蘇四十三由西域歸詐稱得天方不
傳之秘劫立新教煽惑愚回謀爲不軌四十九年田五繼之大軍
先後致討罪人斯得然其根株未能淨絕也嘉慶年間有穆阿渾
者與首逆馬化澂之父馬二復以新教私相傳授至馬化澂而其
燄漸張復託名經商到處煽惑回民行其邪教近據各賊供京師
齊化門直隸天津及黑龍江吉林之寬城子山西之包頭暨湖北
漢口等處均有新教徒黨在彼傳教其傳教之人曰海裏飛如內
地之稱經師曰滿拉如內地之稱蒙師而品望皆在阿訇之次馬
化澂則自稱總大阿訇也其教規大略與回回老教亦同惟老教
誦經則合掌向上新教則兩掌向上而不合老教端坐誦經新教
則夥誦唧噥頭搖而肩聳老教送葬不脫鞋新教脫鞋送葬凡茲

細節異同固無闕彼教輕重然新教之所以必宜斷絕者爲其自託神靈妄言禍福行爲詭僻足以誘合愚回俾令甘心役使同陷大逆而不知加以顯戮而不悔一如白蓮清香無爲圓頓諸邪教之足以釀亂階而禍天下也臣於金積各犯解訊時細心推鞠有供稱馬化澂能知未來事者如遠客來訪必豫知同伴多寡之數從前官軍攻鞏甯靈馬化澂父子兄弟悉眾抗拒豫言官軍將退回民無事之類有供稱馬化澂時露靈異療病則愈求嗣則得之類有供稱馬化澂如投入新教之人向其自陳過犯罰撻皮鞭代爲懺悔即可免罪之類回性多疑善詐異於常人然一經新教蠱惑卽如醉如癡牢不可破方金積長圍久合時陝甘各回饑困殊常至殺人以食而馬化澂父子兄弟有餘粟無敢竊議之者迫局勢危迫至極猶且互相寬慰謂總阿訇必有保全之法馬化

瀧詣營求撫意在一身塞咎見好諸回而諸回目踵營看視者日
凡數輩見馬化瀧輒雙膝齊跪不呼之起不敢起如非迷惑陷溺
之深豈宜至此茲幸誅夷遷徙異患可冀永除惟新教傳染已廣
回民聚集之處率有傳習新教之人不及時嚴加禁絕仍慮歷時
稍久故智復萌不逞之徒時思竊發又將重煩兵力也除已獲海
裏飛阿訇諸逆穆四穆五馬承祺牛占元牛占寬等業經訊明懲
處未獲之金師傅馬篆鮮二等咨行各省一律捕治外一面出示
曉諭所屬各府廳州縣回民嚴禁傳習新教其從前誤被新教迷
惑之人概准自首悔教免其治罪庶幾漸趨覺路永拔迷津新教
絕而回族安關隴可保百年無事至各省傳習新教爲時尚淺良
回僉稱新教傳染雖廣各省回民亦頗知爲彼教異端多有不肯
遽信者如黑龍江回民約二千餘而傳習新教者僅祇百餘卽其

明驗若乘此時嚴加諭禁無難豫杜亂萌合無仰懇 聖慈飭下各將軍督撫大臣嚴禁回回新教出示轄境各回寺嗣後遇有新教阿訇海裏飛等到境煽誘愚回卽由各回寺首董縛送所在官司訊明懲處其從前被誘誤入新教之人仍准首悔免罪則愚回有所懼良回有所慕不但地方可臻安謐卽回民亦長荷高厚保全之恩於無既矣 上諭軍機大臣等據左宗棠奏請禁絕回民新教自爲思患豫防起見惟回民散居各省同隸編氓各安生業若因區別舊教新教設爲厲禁地方官稍不加察書吏藉此按求騷擾必致回眾驚疑轉生枝節從前乾隆四十九年回逆田五等滋事以後欽奉 高宗純皇帝聖諭查辦此事止當分別從逆與否邪正之殊不必論其教之新舊欽此嗣於乾隆五十四年經勒保奏稱新教爲回教之大害擬令靜甯等處頭人訪察稟首復奉

聖諭令其設法化導不可區別新舊之名仰見 垂訓周詳具

有深意此次馬化澂倡亂及身既被刑誅徒黨亦遭殲戮正可惜

此剴切曉諭俾該回眾等及早改悔不至誤入迷途自陷罪戾該

督見既出示所屬州縣禁習新教並准自悔免罪仍著嚴飭該地

方官妥爲開導不可操之過蹙致激事端所請飭各省一體禁絕

之處可從緩辦理也將此諭令知之○丙申諭軍機大臣等馮子

材康國器奏勦辦邊境土匪克復越南木馬省城暨籌議勦撫機

宜各摺片馮子材籌辦越南踞匪督兵前進取道南甯先將宣化

隆安股匪次第勦除肅清內地伏莽鎮安官軍會同夷兵平毀大

嶺茶嶺等處賊巢攻克木馬省城勦辦尙爲得手該提督見已派

撥兩營駐守並咨照越南派兵嚴防要隘免蹈上年覆轍又爲賊

踞卽著馮子材督兵迅赴龍州就近察看情形妥籌勦撫期於一

勞永逸綏藩服而固邊防不得敷衍了事宣化隆安餘匪並著馮子材康國器嚴飭地方文武認真按捕免致餘燼復然此次出力員弁准其擇尤保獎毋許冒濫蘇惻漢就撫後仍復觀望懷疑越南近又有股匪十數起猶須懾以兵力馮子材等擬俟各軍到防後約會該國先將邊界各匪分別剿撫卽分軍扼要駐紮隨時相機應援所籌尙是惟當實力協助不可稍分畛域應否添募營勇之處著卽酌度辦理至慶泗等府屬境屢有黔苗竄擾尤當加意嚴防著馮子材康國器迅飭孔憲隆潘其泰越境進兵協同黔軍掃除獨山荔波各匪進規古州擣其巢穴免致侵軼爲患平樂密邇省城該處有匪徒搶掠富川恭城等處亦有江華匪股竄入雖均經兵勇分頭按剿擒獲匪首多名尙恐外來匪徒勾通內匪滋事著康國器飭令會協均迅將敗匪就地殄除毋任逃匿江華富

川交界處所卽著資成陳培桂約同楚軍實力搜拏毋令餘匪乘間竄突以固疆圉將此由五百里諭知馮子材並傳諭康國器知之○戊戌諭軍機大臣等巴揚阿等奏湖南會匪攻陷城池見在布置情形一招會匪疊陷益陽龍陽兩城龍陽已於四月十八日克復匪股回竄益陽該逆見雖退出龍陽並未大受懲創難保不再行紛竄荊州等處邊防未可稍形疏懈著巴揚阿李瀚章郭柏蔭希元文全悉心會商督飭派出各營嚴密防維毋令匪蹤闖入前諭李瀚章郭柏蔭會商郭松林扼要設防如常郡情形喫緊該提督自應越境助剿仍須兼顧荊州防務巴揚阿見擬商令郭松林移紮常郡會剿卽以荆旗備戰之師遙爲策應應如何酌度緩急妥籌布置之處著巴揚阿李瀚章郭柏蔭希元文全會商辦理湖南逆匪滋擾兩縣城池相繼失陷軍情極爲喫緊郭柏蔭奏益

陽龍陽失守於本月初三日早經報到本日又據巴揚阿等奏龍陽業已克復乃劉崐身任本省巡撫竟無隻字奏到不知所司何事顚預已極殊堪痛恨著傳旨嚴行申飭劉崐見在如何布置朝廷亦無從知悉該撫務當振刷精神督飭官軍迅將此股逆匪就地殲除儻縱令匪勢蔓延擾害地方或不能實力剿辦俟匪蹤退出以業經收復縣城一奏了事致貽養癰之患恐劉崐不能當此重咎也將此由六百里各諭令知之○諭曾璧光奏剿平下游股匪收復八寨等城一摺貴定平越等處賊股既經殲除都勻所屬平浪各賊巢亦已攻破惟逆首李思腐逃往桃花五寨未獲其定番李高脚一股經副將何世華等擊敗由廣西一路奔竄李逆亦未就擒仍著嚴飭派出各軍分投追剿務將著名首逆設法擒獲以絕根株昨據康國器馮子材奏見令副將孔憲隆潘其泰協同

黔軍勦辦獨山荔波苗匪此時李高脚一股竄往粵境人數已屬
無多著馮子材康國器卽飭孔憲隆等會合黔軍前截後追迅將
此股殘匪悉數殄除以清邊患苗酋聞國興等率眾投誠收復八
寨上江下江三腳各城曾璧光見令率領原部駐守八寨並調劉
廷玉一軍前往鈴束仍著隨時察看情形妥籌布置毋稍大意一
面趁此聲威飭令王彥等軍由平口一帶進兵兼爲八寨聲援次
第由都勻麻哈各路節節進勦早靖苗疆將此由六百里諭知曾
璧光馮子材並傳諭康國器周達武知之○予貴州陣亡參將黃
立成祭葬世職○辛丑諭軍機大臣等劉岷奏會匪闖入益陽龍
陽兩城旋即克復見在跟蹤追勦一摺此次會匪滋事疊陷益陽
龍陽兩城雖經羅德煌姚華武等軍進勦獲勝擒斬多名將兩城
先後收復惟倡亂逆首尙未被擒餘匪復四散潛匿必須實力接

捕淨絕根株著劉岷督飭李光燦等統帶兵勇認真搜拏務將劉道美劉貫三何春台等全行弋獲不准一名漏網其竄逃餘孽並飭水陸各軍嚴防竄路四路兜拏以期盡數殲除劉岷於地方緊要軍情遲至半月始行奏報實屬不知緩急前已傳旨嚴行申飭若再不振刷精神力圖激奮或令稽誅逸犯餘燼復然惟該撫是問郭伯蔭前已商令郭松林督兵駐紮荊州見雖兩城已復而伏莽未淨仍恐勾結竄突李瀚章郭柏蔭總當與郭松林隨時咨商嚴密巡防毋稍鬆懈將此由五百里各諭令知之○壬寅諭軍機大臣等定安金順奏甯夏西岸三縣回匪勦辦完竣請將道員汪景度簡用定安奏西來回匪滋擾烏喇特旗界內金順奏請將管站各員獎勵各摺片納家牘賊巢業經攻克甯夏甯朔平羅一律肅清其投出回民業經定安金順分起發交地方官安置靈州逃

來之回亦解交該州收管著左宗棠張曜仍隨時密爲查察妥爲鎮撫毋令再滋事端金順見應前赴烏里雅蘇台將軍新任甯夏一帶如尙有潛匿餘匪著張曜統率各營認真搜捕務絕根株陝回尙有老弱男婦五百十五名口應否解至平涼安插著左宗棠會商金順張曜妥籌辦理甯夏軍事見已完竣金順張曜所部兵勇應如何分別撤畱或包頭纏金一帶有須添兵防剿之處著定安金順張曜悉心會商妥速籌辦阿拉善鄂爾多斯等旗並殺虎口等處管站各員接遞文報尙無貽誤著定安查明擇尤請獎毋許冒濫道員汪景度已交軍機處存記密片一件畱中西來回匪由阿畢爾米特旗竄至白任濠賚及古爾班賽坎一帶分路搶劫嗣有賊匪三百餘人竄入烏喇特中公旗境內在庫克鄂爾濟巴克那等處擄掠續又在中公所屬之洪庫勒塔拉民屯盤踞烏喇

特旗在黃河之北直達歸綏無險可恃亟應派兵兜剿以期就地殲除薩薩布帶隊前進計正與賊相遇著定安飛催該副都統親督全軍星速進行迎頭截擊迅掃逆氛並催直字營馬隊迅赴包頭之西一面分飭駐紮纏金之卓勝營暨大同鎮總兵馬陞各派勁旅由東南面節節兜剿毋任紛竄杜嘎爾務當偵賊所向躡蹤追剿與薩薩布等軍前後夾攻爲一鼓聚殲之計其餘各股見竄何處著定安杜嘎爾確切查明認真剿辦烏城軍情緊要非有知兵大員前往不足以資調度金順諳練戎機戰功卓著著卽迅速啟程前往妥籌防剿以副委任土爾扈特汗布彥鄂勒哲依圖有赴杜嘎爾軍營之說該副都統與該汗是否素識曾否前來謁見來見時如何情形著杜嘎爾卽行據實奏聞將此由六百里諭知左宗棠定安金順杜嘎爾並傳諭張曜知之○乙巳殷兆鏞回籍

葬親轉溫葆深爲禮部左侍郎以邵亨豫爲禮部右侍郎

由內閣學士遷

○丙午諭軍機大臣等劉崐奏援黔各軍連拔賊寨克復丹江凱里各城一摺席寶田等軍攻拔排羊等二百餘寨丹江凱里兩城先後克復勦辦尙屬得手本日業經明降諭旨將席寶田等交部從優議敘出力陣亡各員分別獎卹矣惟向來賞給世職皆係出自特恩豈臣下所得擅請劉崐請將提督彭芝亮等賞給雲騎尉世職實屬不諳體制所有彭芝亮等五員著劉崐另行擬請獎敘見在丹江凱里一帶苗寨雖已掃蕩而逆首金大五包大肚均未擒獲張臭迷等復集潰黨盤踞雷公山若不乘其喘息未定迅速進剿必致勾結黨與復肆蔓延席寶田見旣回軍施洞著劉崐飭令趁此瘴癘未作會合戈鑑剋日進兵迅將雷公山賊巢攻拔並將逆酋張臭迷等設法擒獲毋任漏網其螃蟹等境亦當次第規

復以期早靖苗疆八寨上江下江三腳各城已據曾璧光等奏報收復刻下軍事正在得手著曾璧光迅飭各軍由都勻麻哈各路節節進剿聯絡楚師埽除餘孽不可稍涉遷延另片奏請將已革副將拏問提督審訊等語已革常德協副將陶藻前於會匪竄犯龍陽時帶兵四百名在城防守並未力戰遽行出城潰退滄港土匪乘機搶掠並有潰兵同搶情事情殊可惡陶藻著卽拏問交劉岷嚴行審訊按律懲辦毋稍寬縱此次會匪敗竄桃花江一帶共有若干人道員李光燦剿辦情形究竟若何劉岷所奏竄匪擒斬略盡是否確實該撫務當會同李明惠督飭官軍實力兜剿將匪首劉道美等全行捕獲並將滋事匪黨悉數殄滅以淨根株若一味粉飾敷衍了事致貽養癰之患必惟該撫是問將此由六百里諭知劉岷曾璧光並傳諭周達武知之○以克復貴州丹汀凱里

二城並攻拔排羊等處賊寨記名布政使席寶田得旨嘉獎賞提督蘇元春黃馬桂餘陞敘有差予陣亡總兵官陳顯祥等十六員祭葬世職加等○丁未諭軍機大臣等定安奏西來賊股尙眾見籌布置並請添撥山西協餉催山東欠餉各摺片據稱西來賊股見仍盤踞烏喇特旗之洪庫勒塔拉地方並據各處探報賊匪約有萬餘由阿畢爾米特旗西北界分股東竄等語該逆因北路大兵雲集又無糧食可掠是以鋌而走險竄向東南烏蘭察布盟所屬各旗較爲喫緊其前股竄踞洪庫勒塔拉地方僅四百餘人當不難於殄滅著定安催令薩薩布迅速前進分隊兜擊並飭金運昌馬陞各軍合力進剿先將此股就地殲除免致勾結蔓延轉形棘手包頭地方素爲賊匪垂涎尤應加意防範定安見調毅前軍五營駐紮台梁一帶並令水師由托克托城至包頭一帶梭巡布

置尙安所派馬步各隊分紮烏喇特茂明安等旗境內亦頗周密
卽著飭令派出各軍勤加偵探遇有賊蹤竄近飛速截剿毋稍鬆
勁該逆若分股東竄則察哈爾一帶亦恐喫重著文盛先事圖維
妥籌防剿軍臺大路爲北路各城大軍糧運所關設被賊擾尤屬
可虞賽爾烏蘇一帶應如何撥兵保護之處著文盛張廷岳阿爾
塔什達會商辦理直隸續派古北口軍一千名著李鴻章催令剋
日啟程前赴庫倫以備張廷岳等扼要分紮不可稍有遲誤杜嘎
爾見駐哈爾尼敦距賊較遠豈可頓兵坐待致誤戎機著卽探明
賊蹤所向督率馬隊緊蹙追剿並與定安派出各軍聯絡聲勢合
力兜圍以期早殄逆氛金順接奉前旨諒已部署啟程所部得力
馬步各隊諒必酌帶前往亦可與杜嘎爾定安各軍會合迎剿刻
下甯靈甫定河西尙有零星竄匪且阿拉善旗西界時有鎮番賊

匪竄擾張曜所部各軍應如何扼紮防範之處著卽妥籌辦理定
安見因添募馬勇及調派土默特官兵需用餉銀請飭山西於每
月應協歸綏防餉三萬之外再增銀五千兩見在歸綏防務緊要
著何璟張樹聲迅卽先行如數籌撥歸綏糧臺以後仍按月源源
批解毋稍遲緩山東應解歸綏防餉每月二萬六千兩著丁寶楨
迅飭藩司將欠解銀兩剋期埽數解清以應急需將此由六百里
諭知李鴻章定安金順文盛杜嘎爾丁寶楨何璟張廷岳阿爾塔
什達並傳諭張樹聲張曜知之○戊申諭內閣金順奏辦理回務
完竣一摺甯夏河西一帶回民良莠不齊疊經金順會同張曜分
別勦撫續又查獲馬強米萬銀納玉標牛大科等訊明正法所有
甯夏甯朔平羅投誠回眾均交地方官編立保甲妥爲安置毋令
失所經此次安插撫恤後該回眾等務當改過自新各安生業毋

得再有反側負朝廷寬大之恩其附近漢民亦不得有意尋仇藉端控告致啟猜嫌總期彼此相安爭端永息地方官吏遇有漢回事務尤當持平辦理不可稍有偏袒以昭公允而弭釁端○諭軍機大臣等金順奏甯夏回務已竣見分兵布置一摺甯夏爲北路巖疆刻下雖臻靜謐而西路賊氛尙熾自應分布設防金順會商張曜分派各隊扼紮磴口橫城等處所籌尙屬周密金順啟程後卽著張曜督飭派出各軍嚴密防剿毋稍疏虞河西三縣投誠之回均已造冊交地方官編立保甲妥爲安置其附逆之徒並由受害漢民控告者亦經金順等按獲正法至四百五十餘名之多該回經此次痛剿自當懷德畏威不至再生反側惟附近漢民亦不得有意尋仇致成釁隙本日明降諭旨一道著張曜刊刻謄黃徧行曉諭俾漢回永遠相安以副朝廷一視同仁至意阿拉善旗地

方既有西來竄匪搶掠牲畜之事張曜務當飭令馬步隊伍迅往防剿毋任蔓延花馬池一帶亦有匪蹤出沒左宗棠當檄飭東路官軍實力剿捕張曜仍當妥籌兼顧毋稍疏懈河州等處逆裔方張左宗棠總當激勵諸軍鼓行而西滅此朝食豈可頓兵不進致軍心懈怠將士思歸以勝兵而轉成暮氣該大臣自金積堡克復後久未據報進兵機宜實深廑繫著懷遵疊次諭旨迅將籌辦情形據實具奏不得粉飾遷延致誤大局金順另片奏軍營設局鼓鑄礮子需費甚鉅無款歸還請飭部撥銀二萬兩以清款項並請飭河南撫臣嚴發張曜局費等語著袁保恆卽於西征糧臺等撥銀二萬兩清還金順鑄礮局費其張曜營中礮局之需卽著李鶴年如數籌撥作正開銷前據曾國藩奏續飭上海製造局製備洋火藥二萬磅洋礮藥五千磅金底大銅帽二百萬顆二十四磅開

花彈子四千箇藥引六千箇木心六千箇委員解交天津道查點收存由金順委員迎提赴營等語著金順張曜迅速派員赴津提解到營以應急需金順見須前赴烏城此項軍火應如何分撥應用之處著與張曜妥商辦理將此由五百里諭知左宗棠金順李鶴年並傳諭張曜袁保恆知之○己酉諭內閣曾國藩奏曾任提鎮大員尋仇搆毀據實參奏一摺前任江南提督李世忠因事逗畱揚州與前任浙江處州鎮總兵陳國瑞相遇李世忠挾陳國瑞從前奪取鹽船銀物各仇陽與交好於四月十四日潛赴陳國瑞寓中喝黨將陳國瑞捆縛赴船行抵揚州四里鋪地方適陳國瑞之姪陳澤培等趕至呼救一時各船水手人等譁聚來援李世忠將陳國瑞藏匿自覓小舟逃走落水遇救得生其輜重被搶一空家屬亦遭毆辱致有落水淹斃者此案李世忠以提督大員輒行

尋仇鬪狠實屬不安本分李世忠著卽行革職勒令回籍交地方官嚴加管束陳國瑞與李世忠往來日夜演戲致生事端亦屬性非安靜著以都司降補勒令速回湖北原籍交地方官嚴加管束李世忠陳國瑞均不准在揚州逗留○諭軍機大臣等本日據曾國藩奏參李世忠陳國瑞在揚尋仇構釁業經明降諭旨將李世忠革職陳國瑞以都司降補均勒令回籍矣該二員素性獷悍不安本分每在外滋生事端此次僅予薄懲勒令各回原籍不准在外逗留於懲創之中隱寓保全之意著李瀚章郭柏蔭於李世忠陳國瑞到籍後飭令地方官隨時畱心查察嚴加管束如再出外生事或在本籍不受約束卽行據實參奏原摺均著鈔給閱看將此各諭令知之○左宗棠奏平涼府屬鹽茶廳固原州所轄東西兩山界連甯夏鞏昌慶陽涇州各府州地方千餘里巖壑複沓漢

回雜處素爲藏奸淵藪臣疊飭各軍窮搜徧輯以護餉道而靖地方擒斬首要各匪疊經馳報而賊計愈猾往往寄孥於河州各賊巢勾結外匪每起數百騎或數十騎剽掠兩山間見官軍至則避匿無蹤兵退復出倏東倏西颺忽狎至與北方馬賊巢匪同而此間地廣人稀山谷盤互驅除尤爲不易疊據署平慶涇道魏光燾稟二月初三日所部前營副將魏紀鋆馬驍子股匪於紅羊坊一帶陣斬六十餘名初五日追及王家堡沿途斬賊七八十名初八日復接斬十八名生擒九名適新營副將蕭玉元後營副將鄭連拔由硝河城運糧回防行過天中溝遇賊騎二十餘狂竄而西遠追及之擒斬略盡訊據賊供逆首馬驍子已帶重傷伏鞍竄匿矣記名提督周紹濂派隊攻羅山謝家段頭各賊巢斬馘數十生擒十餘名內有僞元帥袁希孟王添發兩名皆金積未破之先馬

化澧遣其出外求援未及歸巢者袁希孟卽閻希孟兇悍尤著曾爲馬化澧守峽口以抗官軍者也東山此段以豫望堡地勢最爲險要向爲回目馬添發所據馬添發伏誅後旌善營營官都司銜馬柏森收用其夥馬彥澧李萬海嗣因其不服調遣革逐之馬彥龍李萬海心懷觖望三月初七夜刺殺馬柏森脅其黨以叛周紹濂魏光燾聞變率隊圍剿賊知大兵將至向毛居士井元城子一帶紛竄魏光燾派總兵于奇泮副將蕭玉元追之遇賊下馬關陣斬騎賊七十餘名生擒五名副將魏紀釐追至元城子地方斬步賊十餘名提督徐文秀自白壩追至十六夜三鼓襲賊於梨花背山溝斬賊七八十名生擒二十餘名二十六日提督戴奉聘由鎮原按剿至楊家莊一帶斃賊六十餘名副將李瑞林吳啟雲按剿下馬關迤東一帶深山陣斬賊黨十數名生擒賊目楊金潮寨宗

丁阿渾及陝回四十餘名而馬彥濬李萬海遂遠竄西山深處百
草原中灘一帶踞險爲巢與西山要逆馬贛子李百寬馬才宗潛
相勾結李百寬者鹽茶廳屬賀家堡回首舊與逆回馬忠海通馬
忠海伏誅後李百寬與其弟李百申李文虎藏畱馬忠海餘黨李
文魁楊保祿及馬化濬之戚屬田如貴懼官軍搜捕夥謀竄附河
州賊巢三月二十九夜勾河州賊數百挈眷潛逃適周紹濂遣所
部遊擊周署良率右營馳抵鹽茶廳城得報會同署鹽茶廳同知
范廷樑潛師夜起襲之四月初一日黎明馳抵澗溝堡正值該逆
蠶擁前來周署良突起奮擊賊駭而奔官軍分起追殺斃賊百餘
名生擒李生雲馬五十二馬六個子將李百寬眷屬截轉賀家堡
訊據賊供李百寬同另股伏紅羊坊防官軍由前面截勦不虞後
路官軍之驟至也十二日魏光燾飭所部前營副將魏紀奎搜捕

雅牙兒灣一帶匪逆日馬彥濫由關門山竄至擊敗之賊折由鹽土溝一路東竄良回都司銜穆進善率旌善二起馬隊拒之少卻收駐南窯洞賊仍東竄穆進善馳報魏紀鋆出官馬套截勦行至黑溝口賊已由沙臺堡竄出魏紀鋆突起奮擊敗之賊由柯家寮向崖窯南竄適提督左日升總兵于奇泮朱上林由黑城子出隊截之朱上林率馬隊衝入賊中斬先鋒悍賊十餘名而奪其馬步隊繼至賊敗折西竄是夜四鼓魏紀鋆追賊至崖窯詢之堡民知有敗賊百餘騎在黃蒿灣急起掩之擒斬過半十四日黎明追至楊明堡收隊十六日詎知河州賊匪另股馬步二三百竄踞條子溝李百寬復帶騎賊百餘徑赴賀家堡接取眷屬適大雨如注咫尺莫辨行徑魏紀鋆揣條子溝之賊必李百寬要約而來意在阻官軍截勦以便接取逆眷宜先進賀家堡截賊出路比發號

疾馳行十數里至張家原則李百寬已奪取逆眷避雨窯洞燎衣作炊馬鞍盡卸矣見官軍驟至紛紛出窯列拒魏紀鋆率親兵馬隊衝入立斃執李字旗悍賊兩名馬步各隊分途齊至都司強占魁馬隊哨長劉義縱橫盪決斃賊遂多李百寬退入窯洞喉黨死拒勇丁何來福差弁張貴元張吉飛及馬隊軍功馬生德躍馬向前生擒李百寬比飭右後兩哨押犯赴堡子臺而餘賊已護逆眷逸去魏紀鋆率馬步隊迅追逸賊馳八十餘里沿途斃賊約百餘名並將李百寬李文虎眷屬奪獲收隊回條子溝時已戌刻矣忽聞堡子臺礮聲不絕料必有事魏紀鋆仍率所部由條子溝截去見堡子臺來賊百餘與右後兩哨相持卽躍馬衝入擒斬數十名騎賊四五十名向種田溝敗竄詢之生擒賊供蓋聞李百寬就擒相約來此劫犯也正擬追逐間適參將宋南山守備徐有禮由小

溝收隊歸與此起竄賊遇奮威截殺誅滅殆盡又行數里至劉家井見各廢窯中火光騰灼知敗賊悉踞此間遂派隊圍定溝口督隊衝入盡數殲之同日據隆德轉運局員通判張潤飛報署隆德縣知縣周其俊約駐十里鋪護運馬隊營總十六日輕騎赴北路履勘形勢總兵銜副將王有慶李松林隨身小隊同往行至距縣城四十里野雞峴突遇大股騎賊千餘從山後突出眾寡莫敵王有慶李松林周其俊同日陣亡馬勇戰沒者數名臣於十七日午刻得信疑西山一帶向無千餘騎成股之賊其時未知李百寬業已就擒意其糾合馬彥濬等要逆及河州匪黨同來窺劫糧運也立調步隊三營馬隊三營由瓦亭踰六盤山向北追勦又飭親兵左後兩哨踰空同山繞化平川出龍江峽口而南出底店門扇岔抵隆德冀得痛勦以盡根株二十六日得管帶副藍旗馬隊副將

尤成章飛報十七日由高堡臺披山到新營川據探馬馳報不知何路突來馬賊百餘步賊二百餘由硝河城南三十五里巴斗溝假充官軍攻破良回王家堡肆掠逸去尤成章立即拔隊五鼓馳抵三岔口土人告知對面嶺畔窯洞微露火光即攻堡之賊住宿處也尤成章即挑壯士傳口號夜砍賊館比踰溝登嶺賊猶未覺壯士指火光明滅處大呼殺賊賊即驚慌亂竄昏黑中斃於亂刃者約數十名黎明躡蹤追剿行五十餘里至雙樹地方賊見追軍無多列陣抗拒尤成章率遊擊喻永勝千總孫成德下馬挺矛衝入賊陣手斬黃衣賊目一名而奪其馬砍斃手執方白旗賊目一名喻永勝肩受礮子傷一處胸脅受刀矛傷四處孫成德面受刀傷尤成章衣被槍子穿身透數處猶奮威督隊力戰斃悍賊數十賊始大奔將士躡追猛進賊擠墮澗壑自相蹂藉死者無數訊據新

裏回民馬福海及活賊口供所斬黃衣賊目爲馬才棕十六日野
雞峴戕王有慶李松林周其俊者卽此賊也人馬約共三百有奇
始知隆德所報賊騎千餘不足信臣前疑李百寬糾合馬彥濫等
伺劫糧運者亦非也二十四日靜甯防軍記名總兵吳隆海調賊
擾州西北八十餘里王家溝急起擊之斬悍賊四名二十五日追
至焦家河上王家一帶擒斬二十餘名拔出隴西鎮被裏漢民十
四名收隊回防所擊者卽此起敗賊兇鋒已挫不能爲隆靜北路
之患矣竊維鹽固東西兩山首要各逆均已陸續擒斬臣於正月
二十五日附片陳明並聲敘未獲逆目惟狗齒牙子靖遠聾子馬
才棕馬母驢閻希孟金添安等數犯續據該提督周紹濂報斬閻
希孟金添安近復據報靖遠聾子帶傷後昇至乾鹽池身死馬母
驢卽沙母驢子已經提督楊世俊陣斬茲馬才棕復經尤成章陣

斬除狗齒牙子聞已逃赴河州尙無確耗此外著名各逆均已伏誅而李百寬一股又已殲除俟接捕馬彥濤李萬海等竣事東西兩山周千餘里間伏莽盡除運道無虞梗滯矣又奏南路官軍勦賊獲勝情形業經馳報旋據漢中鎮總兵李輝武報稱四月初一日有回逆約數百假裝官軍馬隊竄至兩當總兵文德盛迎擊於簸箕灣敗之賊竄徽縣娘娘壩初二日二鼓徽防提督胡國珍總兵蕭德林截賊於場外山旁獲勝斃賊甚多生擒萬海明等十餘名初三日賊由前川向秦州屬境竄去提督楊世俊一軍駐紮石佛鎮初五日偵賊游駛秦屬雙溝窪王家河趙家山一帶掠劫糧運當飛調各營自北而南初七日四鼓飭馬隊張兩翼猛撲雙溝窪王家河以扼其吭步隊跨趙家山脊自上壓下直擣中堅該逆勢不能支官軍四面環擊陣斬三百餘名生擒四十餘名追殺五

十餘里據擒賊供稱此股頭目係河州馬秀馬貨郎麻哈等由安定康家崖竄出此外尙有悍目馬榮蘇萬祥劉羊等各率黨分竄意圖合股擾運不料猝遇官軍馬秀馬貨郎俱被斬於陣餘眾殆盡另股東竄之賊折擾禮屬鹽關一帶楊世俊度其必循占城西遁也初八日四鼓潛師於禮屬麻子溝鹿家山待之天未曙賊果至伏起突擊衝賊爲數段馬步縱橫淹擊陣斬百餘名生擒三十餘名漏網者僅十餘敗賊耳劉羊以二百餘騎擾及秦屬梁家大莊楊世俊於是夜駐軍劉家河初九日蓐食奮擊斬馘百餘級賊向西狂奔馳追九十餘里於伏甯屬包家莊大草灘及之斬劉羊於陣初十日窮搜崖壑已無賊迹其竄擾甯遠屬馬力坡一股數百騎三月二十八日總理宗岳軍營務提督張仲春訥知賊騎擾及甯遠屬之西溝卽出隊掩擊二十九日行抵西溝短兵相接立

斃悍賊多名四月初一日賊駛至禮屬靈芝山王家寺各處張仲春連日冒雨窮追飛飭所部各營分股痛剿初三日敗賊於王家寺槍礮矛刺死者二百餘人殲賊目何二於陣初五日探悉另股賊目由娘娘壩鹽關竄至伏羌屬楊家寺張仲春卽拔隊馳赴固城度賊必由東溝竄走設伏伺之初六日黎明賊騎擁至官軍奮起迅擊盪決縱橫賊屍枕藉追殺五十餘里初八九十一等日攔剿包家莊謝家莊等處均疊有斬獲我軍陣亡三名而已生擒賊目張善善子張馬逢楊復子數名解護周開錫行營正法見派隊搜剔山谷其另股賊於三月二十七日由娘娘壩各處竄擾觀音店復經總兵田連考道員田應龍連日窮追四月初三日分率所部一扼龍潭壩截其竄微之路一馳抵徐家溝口緊躡賊蹤各嚴陣以待登高瞭望見賊飄忽游駛慮其有伏田應龍率所部折回

溝西防抹援溝口之賊田連考飛派虎威中營幫辦田得勝哨官
田慶先由東路進鎮西營幫辦文仕茂帶哨官田興餘進左已革
總兵熊煥章帶鎮西營前後哨進右田連考自領親兵中哨哨官
吳有恆居中策應候選縣丞田治元督隊衝突身受重傷陣稍却
賊遂擁合圍我軍排陣抵禦槍矛齊施正酣戰忽溝西礮響田應
龍率哨官王仁和及副將謝復盧馬隊自溝西馳至田連考突圍
合攻斃賊百數十名賊拚命奔竄又追殺百餘名生擒八名窮追
十餘里我軍陣亡勇丁二名虎威鎮西兩營受傷勇丁二十餘名
而已二十五日復截於柳家溝斃賊數十名生擒二名其餘之賊
向通渭回竄會甯二十七日駐通渭之二起馬隊總兵銜副將李
華擊之於曹家川斃賊三十餘名臣維竄匿河州之賊多係甘南
及鹽茶固原會甯安定敗殘餘孽而秦川屬鹽關禮縣逆回亦頗

涸迹其間零騎偷竄固所不免幸退無可據之險進無可掠之食旋竄旋滅固無能爲患也又奏竊鹽固東西兩山及甘南一路賊蹤飄忽官軍疊次勦辦獲勝擒斬賊目多名見籌辦理情形經臣據實陳明諭旨垂詢各節多與陝甘兩省交界州縣探報大略相同而各軍營稟報則有合有不合四月初八日官軍無追賊至禮縣長道鎮接仗挫敗之事娘娘壩高橋牡丹園本係一路相距不遠並無千餘騎竄擾之事至秦州北鄉鹽合城有回匪三千餘由河州潛渡洮河長驅東下見在盤踞甯遠縣屬馬塢新寺一帶分股四出以擾後路糧道一節臣處並無所聞以勢度之亦必無其事查河州轄境周四百餘里東自狄道州境渡洮而西與西甯接土回頭目之著名者馬尕大馬占鼉馬阿渾劉阿渾尕卿約臨洮謝大師外尙有撒拉番回內八弓外八弓頭目老阿渾等股數甚

多近來未嘗入犯其入犯者多甯靈鹽固一帶及秦州各屬敗殘土匪之遷徙河州者人數零雜並無大股其入犯也必由洮河下游三甲集康家莊渡洮船小湫急雖有大股亦難徑渡且賊之所以能逞其颺忽狎至之技者正以人少則運掉易靈若多至數千復盤踞一處則官軍合力攻取尙易爲功如果三千賊騎盤踞甯遠新寺馬塢則西北踞鞏昌不過百餘里東南距秦州亦不過二百餘里鞏秦豈無急報何以兼旬之久臣處迄無所聞大抵軍中探報距賊較近各營尙有可信若州縣營汛報則皆塘兵差役道聽塗說數十里百餘里外捕風捉影之談毫不足據臣隔省所得傳鈔探報又事後捕風捉影之談更無論也竊維軍事尙質實忌虛浮虛浮之弊起於訛誤者有之起於意見者有之臣忝預軍事十有餘年敗仗則報在人先勝仗則報在人後經勘定地方從無

大股竄踞重煩兵力之事蓋愚拙之效可觀者如此至進規河州之舉臣前奏已略及之見時遞運三箇月糧料草束尙未竣事若急於前進則隨運隨耗後無可繼之糧河州夏收約在六月底秋收約在七八月若急於前進則未及成熟前無可因之糧非穩著也又洮河深淺廣狹隨處不同而溜勢湍急與黃河無異由狄道安定隴西進兵海路皆須造船架橋所需器具亂後人物凋殘勢難咄嗟立辦而鹽固東西兩山餘匪及甘南一帶餘氛均應趁此閒暇逐加料理以免後顧之虞防軍未移之先無旬不有戰事亦非坐食虛糜可比察看近日軍情並未稍涉驕惰臣亦不敢因

聖明詰責之嚴故爲諉謝也 上諭左宗棠穆圖善奏南路各軍剿賊獲勝卽著左宗棠穆圖善督飭各軍實力防剿務將殘匪搜捕淨盡毋使賊氛再有紛竄以固南路邊防左宗棠另片奏遵覆

河州等處軍情並進規河州一時未能進取各情形覽奏均悉軍營探報遠近不一傳聞容有異詞朝廷既有所聞卽不能置之不問該大臣惟當仰體朝廷西顧之殷將進兵機宜悉心籌畫並激勵將士殺敵致果迅奏膚功用副委任正毋庸瀆辯爲也將此由五百里各諭令知之○予甘肅陣亡總兵官羅榮卿副將王有慶等祭葬世職○辛亥諭內閣前因宗人府等衙門奏主事福珣被扎身死一案訊有鄭親王承志主使情事當派軍機大臣會同宗人府刑部詳細研鞫茲據奏稱連日質訊要犯玉壽等已將該親王指使糾毆情形供指確鑿而該親王堅稱並無其事且呈遞親供前後自相矛盾其爲任意狡展更屬顯然請旨先行革審等語承志著先行革去王爵其應訊各情及一千人證著管理宗人府王等軍機大臣會同刑部嚴行審訊按律定擬具奏○諭軍機大

臣等李鴻章奏日本使臣將抵天津請派大臣在津會議立約一摺已另有諭旨派李鴻章爲全權大臣並派應寶時陳欽隨同幫辦矣該大臣俟日本使臣到津後務當督飭應寶時陳欽悉心籌畫杜漸防微總期周密妥善免致將來窒礙是爲至要本日簡派全權大臣諭旨一道一併發往如該使索看憑據卽著李鴻章另行恭錄給予閱看俟議約事畢此旨仍繳還軍機處備查將此由四百里諭令知之○命直隸總督李鴻章辦理日本國通商條約事務江蘇按察使應寶時署直隸津海道陳欽隨同幫辦○癸丑諭軍機大臣等都興阿等奏查勘鳳戩二邊門外地段完竣並擬畫畱界限情形繪圖呈覽一摺鳳戩二邊地段經都興阿等督飭協領崇善等分段查勘北自鑿陽門屬之八里甸子等處起東至兩江匯口轉向西南至海沿江有漏河一道下至廟爾嶺直至貢

道北老邊牆處接續貢道南烏津飛大孤頂子等岡斜向西南至舊邊柵小黑山止均擬酌展爲邊卽著照所議辦理其貢道三角一隅之地雖據該協領等請仍舊制毋庸繩丈惟大東溝一帶江海相連時有匪徒叢聚都興阿等務當嚴飭鳳凰城城守尉等詳細查明相機妥辦至畫畱界限藉資間隔原以內撫游民外綏藩服今則沃壤膏田私墾已徧遷移不易安插亦難殊於邊境大有關繫都興阿等務當詳度情事先事豫籌於查辦鹺廠旺清邊地完竣設法圖維據實奏明辦理所有應畱封禁之地並著該將軍等斟酌機宜隨時妥辦以昭慎重所呈地圖卽著畱中都興阿另摺奏海洋匪犯登岸滋擾派兵剿捕各情形海盜登岸搶奪鋪戶掠去商人並敢闖入稅局擄人劫財實屬目無法紀水師營協巡韓珊帶領戰船追捕賊匪棄船登岸將綁去之人均行放回何以

不乘勢緝獲致令逃逸地方官既不會同堵剿駐紮孤山之統領馬步隊又不趕緊截拏其懈弛情形實堪痛恨著該將軍等查明一併參奏以示懲儆仍一面督飭派出員弁跟蹤窮追務期悉數弋獲不准一名漏網將此各諭令知之○胡肇智以病免調胡家玉爲吏部左侍郎轉黃倬爲兵部左侍郎調鮑源深爲兵部右侍郎轉童華爲工部左侍郎以錢寶廉爲工部右侍郎由內閣學士遷○乙卯諭軍機大臣等金順奏請賞假調理並補行守制葬親一摺金順業已補授烏里雅蘇台將軍此次發摺時自係尙未接奉前旨該將軍身歷戎行宣力有年覽所奏傷疾未痊等情殊堪廬念惟烏里雅蘇台爲西北要區自被賊竄擾以後諸事須重加整頓非有知兵大員前往辦理難資鎮壓金順素性勇往不避艱難見旣膺茲重任自應迅速赴任悉心籌辦著仍遵疊次諭旨部署啟程

所部得力馬步各隊並著酌量帶往以資調度將此由五百里諭

令知之○調瑞麟爲盛京戶部侍郎以銘安爲盛京刑部侍郎

閣學士遷

○丙辰諭軍機大臣等張廷岳等奏探悉賊情見籌防勦一

摺據稱四月初十日賊匪在巴噶諾木汗地方與圖謝圖汗部落
蒙兵相遇被蒙兵擊敗竄往東南追至沙巴克烏蘇會同烏喇特
公中旗巡防官兜擊斫斫八名擊傷二十餘名見仍盤踞沙巴克
烏蘇一帶恐向東南竄擾等語所奏賊匪奔竄蹤迹與定安前奏
大略相同惟賊股究有若干未據張廷岳等奏及蒙兵與賊接仗
不能窮追任賊奔逸設徑由東南擾及臺路烏庫文報糧餉被阻
固屬可虞歸綏及察哈爾一帶亦形喫緊總當四面兜擊使該逆
無隙可乘方可一鼓聚殲盡除醜類著定安文盛張廷岳等各飭
派出兵弁擇要堵禦相機扼擊仍隨時勤加偵探互相知照以期

聲勢聯絡杜嘎爾當懷遵疊次諭旨督飭各軍探蹤進剿毋得稍涉鬆勁烏城地方緊要金順當迅速部署馳赴新任並挑帶得力馬步隊迎頭截擊迅掃賊氛正在寄諭間據文盛奏挑選馬隊守衛軍臺糧路並臺站弁兵逃避情形各摺片賊匪竄入烏喇特旗界內文盛揀派右翼兵五百在該翼地方駐紮扼賊東竄左翼馬隊五百在軍臺要路分布偵探惟濟斯洪果爾臺站僅有畢都爾業隨帶官兵四十名在彼督運該處爲察哈爾歸綏運糧要區自應撥兵護守貢果爾所部前在該處駐紮熟悉情形此時北路兵力已厚賊蹤又竄向東南著杜嘎爾卽飭貢果爾管帶所部迅卽馳赴濟斯洪果爾臺站駐紮以保糧路而遏狂氛至布魯圖屬之喜喇穆呼爾等五臺弁兵聞有槍聲恐賊來擾先後逃避以致大同征兵半途阻滯後路軍臺不能轉運覽奏殊深廛繫蒙兵如此

懦怯甚不足恃著文盛趕將已散五臺設法招集設復其未散各臺並著妥爲拊循飭令照常當差毋得妄生疑懼見在軍臺人心未免惶惑亟須有兵鎮壓貢果爾所部未到以前卽照文盛所議將左翼四旗馬隊派赴布魯圖一帶分布駐紮以安眾心大同七起官兵急切不能前進卽著暫紮各臺藉資防堵仍須將各臺駝馬速行整備俾該官兵得以剋期進發並將後路糧石接續轉運不得任意遷延致有貽誤薩薩布所部本由綏遠取道濟斯洪果爾前進著定安飭令該副都統將此股賊匪悉數殲除至濟斯洪果爾臺站後暫紮以護糧運俟貢果爾到時再行西進續調古北口練軍千名曾否啟程著李鴻章催令迅赴庫倫以備張廷岳等調遣將此由六百里各諭令知之○戊午諭軍機大臣等杜嘎爾奏查探賊蹤派隊進剿一摺賊匪由阿畢爾米特旗分股東竄一

股竄入馬蘭察布盟烏喇特旗境內疊經諭知定安催令薩薩布督隊剿辦並諭令杜嘎爾探蹤進剿茲據該副都統奏派稱派令吉爾洪額帶領馬隊四百餘名前進著卽飭令該員探明賊蹤所向迅速截剿該匪股數不一恐其分投竄突杜嘎爾仍當懷遵疊次諭旨勤加偵探撥兵堵擊與定安文盛派出各軍聯絡聲勢迅掃逆氣不得擁兵株守坐失事機昨已寄諭定安文盛仍著該副都統隨時咨照不得稍分畛域惟征兵需用駝隻馬匹尙多缺乏亟宜寬爲籌備著奎昌榮全多布沁札木楚張廷岳阿爾塔什達嚴飭各愛曼速將駝馬解送杜嘎爾營中以應要需杜嘎爾見將烏城餉銀內先撥三萬六千兩發給官兵其餘銀兩仍著飭令派出官兵小心看守毋稍疏忽將此由六百里各諭令知之○己未諭軍機大臣等金順張曜奏遵籌沿邊防剿事宜一摺據稱甯夏

一帶近防遠剿均關緊要該將軍等已分兵布置復商派提督程之偉等帶隊馳往大舍太烏拉等處截剿並於石觜磴口一帶派兵扼紮所籌尙妥卽著督飭各軍於派防處所嚴密堵禦遇有匪蹤竄近卽行實力截剿毋稍疏虞一而招集流民鎮撫降眾以靖地方金順當懷遵疊次諭旨酌帶所部剋日啟程其甯夏防剿事宜卽著張曜妥籌辦理將此由五百里諭知金順並傳諭張曜知之○諭劉嶽昭岑毓英奏官軍攻克賓居賊巢收復雲龍州城並茂克賊巢攻拔情形各摺片賓州所屬賓居賊巢盤踞日久經楊玉科等先後督軍進剿力攻一年有餘克拔堅巢賓川州境肅清雲龍州賊目趙炳南具稟投誠州城亦已收復該處軍務旣經得手大理賊勢自更窮蹙惟雲南縣踞賊負隅未下彌度地方又有賊擾著劉嶽昭岑毓英飭令李維述等實力進剿迅克雲南縣城

並將彌度一帶竄賊悉數掃蕩毋得延緩此次攻克賓居賊巢及收復雲龍州城在事出力員弁准其查明併案請獎其茂克賊巢既經攻拔開化府屬已就肅清仍著飭令張保和等乘此聲威速將田心等處賊巢次第攻克以期一律廓清將此由五百里各諭令知之○予雲南陣亡遊擊陳定邦等祭葬世職○是月緩徵山西臨汾等五縣歉收民借倉穀

六月壬戌太白晝見○諭軍機大臣等劉崐奏益陽等處會匪一律剿除一摺據奏道員李光燦等由桃花江進剿舒塘等處竄匪殲盡無遺益陽龍陽交界資江南北兩岸一律肅清惟所稱查探著名首逆多死於陣語涉含糊究竟劉道美劉貫三何春台等首逆曾否殲斃有無實據抑尚在逃未獲該犯等係起事首惡斷不准任令漏網著劉崐遴派幹員並飭所屬地方官嚴密躡緝務須

悉數弋獲其從逆之犯亦當搜捕淨盡以絕根株該撫見將派出各軍分別撤回酌留李光燦兩營擇要扼紮並派員會辦益陽等處國防仍著飭令該員等認真防範以遏亂萌湖南會匪連年滋事雖立時撲滅而閭閻已被其害劉岷身任封疆當時時以緝匪安良爲念妥爲籌辦不得因循粉飾致負委任所有此次李光燦等軍勦匪出力著准其暫行存記俟清查完竣酌量保奏將此諭令知之○予湖南殉難在籍知州陳景滄祭葬世職○癸亥諭軍機大臣等福濟等奏會議酌派委員總辦糧臺請飭速解馬隊口糧趕辦駝馬等項奎昌等奏遵籌撥兵會勦杜嘎爾奏偵探逆匪奔竄情形各摺片出征馬隊需用糧餉極關緊要福濟等擬請在張家口設立總局由口北道專司其事按月源源運送一面由烏城派員在豁尼齊等處迎提著李鴻章酌量情形或令口北道親

赴張家口或派員前往妥爲辦理期無貽誤惟疏通糧路尤爲第一要著刻下蘇彰陽所帶馬隊在烏城防所已有斷糧之患杜嘎爾營中裹帶之糧亦將罄盡情形實爲困苦前據文盛奏布魯圖屬五臺弁兵聞警逃避糧石中途堆積該都統業已挑撥牧羣駝馬趕爲運送尙能先其所急仍著飭令各臺趕緊整頓齊備務將應需糧餉陸續趲運以資軍食並著杜嘎爾遵照五月二十八日諭旨飭令貢果爾迅帶所部馳赴濟斯洪果爾臺站駐紮保護糧路至駝隻馬匹等項均爲軍營急需福濟等因蒙古力難供應發給西兩盟銀各一萬兩以爲採買之需著張廷岳阿爾塔什達飭令東兩盟長卽行派員赴烏領價一體照辦並著理藩院傳知各該盟長曉諭所屬此次派兵遠征原爲保衛蒙古遊牧地方若因駝馬缺乏貽誤事機致賊匪蔓延愈廣於蒙古生計亦大有關係

該盟長務當力顧大局竭力籌辦不得觀望推延致滋貽誤定安
前奏賊踞洪庫勒塔拉地方薩薩布等帶兵進剿見在剿辦情形
若何本日據杜嘎爾奏賊於五月十五日竄至拉蘇倫巴咱爾所
屬遊牧之巴爾圖叟吉地方與第十七臺相近是否另是一股該
副都統見令吉爾洪額所帶之隊改道追剿著卽飭令緊躡賊蹤
相機截擊並著定安催令薩薩布迅將洪庫勒塔拉之賊剿除淨
盡卽行取道前進探明賊蹤與杜嘎爾所派之兵聯絡聲勢會合
夾擊以期迅掃逆氛邊外地勢遼闊該匪到處流竄防不勝防奎
昌等請將杜嘎爾之兵酌畱一千名於哈爾尼敦以顧烏庫兩城
門戶其餘一千數百名派令跟蹤進剿並請飭綏遠城察哈爾庫
倫各派官兵合力會剿等語著定安文盛杜嘎爾張廷岳阿爾塔
什達悉心會商妥籌辦理總期將此股竄匪設法及早殄除免至

日久紛擾福濟等另片奏前咨綏遠城揀派筆帖式生監一二十名章京三四員赴烏迄今尙未派往等語著定安按照福濟等前咨照數揀派飭令剋日前往毋稍遲延將此諭知理藩院並由六百里諭令李鴻章定安奎昌榮全多布沁札木楚文盛杜嘎爾張延岳阿爾塔什達知之○甲子諭軍機大臣等張廷岳等奏偵探逆匪竄踞情形請飭各路援兵就近進剿一摺據稱逆匪分作三股一股擾及喀喇沁圖固里克暨托里布拉克二臺一股在騰格里諾爾地方盤踞一股竄至噶克察巴揚莫多等處見在圖固里克托里布拉克二處臺站業經渙散烏庫兩城糧餉及宣大兩軍兵食必將阻滯不通非各路援兵合力剿洗不足以肅清邊境各等語賊匪飄忽無常見旣分股滋擾臺站牽掣糧餉要路難保不俟庫倫兵眾前往堵剿卽乘虛撲犯庫倫張廷岳等見調蒙兵六

百名馳往該處相機剿捕並督飭宣化步隊嚴密防守所籌尙屬周密卽著張廷岳等多發偵探防剿兼施毋稍疏懈杜嘎爾駐紮哈爾尼敦一帶距圖固里克等臺站僅二十二臺尙不甚遠著該副都統仍遵本月初四日諭旨偵賊所在派員帶兵進剿匪股分合不定並著飭令帶兵員弁於賽爾烏蘇迤南一帶會同庫倫派出各軍將此三股賊匪聚而殲旃以通臺站而清東路文盛已派兵千名前進著定安酌量情形派撥隊伍合力兜剿薩薩布見紮何處並著定安懍遵前旨飭令該副都統迅率所部轉戰而前至濟斯洪果爾暫紮以護糧運布魯圖屬已經潰散各臺文盛當懍遵疊次諭旨趕緊設復以利師行李鴻章卽飭都司賈吉齡統帶古北口練軍一千名迅速啟程赴庫歸張廷岳等調遣俾厚兵力將此由六百里各諭令知之○丁卯諭軍機大臣等恩麟德泰奏

僧俗番官謀害已革番目分別奏參一摺據稱達爾漢總堪布班
墊頓柱句通噶勒丹寺喇嘛阿丹及札薩克喇嘛札克巴協捻折
窩喇嘛策忍桑結謀令諾們罕呼圖克圖辭退協理商上事務並
定計密差喇嘛分往各處將已革贖罪之普隆噶布倫彭錯策旺
奪結父子池捫戴琿期美奪結大昭倉儲巴江洛拉旺彭錯通巴
戴琿朗結頓柱及見參催果噶布倫密瑪策忍等六人先後謀死
班墊頓柱旋因畏罪潛回噶勒丹寺噶布倫策忍汪曲聽信該總
堪布之言私離職守同往噶勒丹寺集眾抗拒不遵札調等情此
案班墊頓柱謀奪商上之權輒敢句通各該喇嘛謀害多人不法
已極策忍汪曲聽信班墊頓柱煽惑擅離職守情亦可惡班墊頓
柱原授達爾漢總堪布職名札克巴協捻見授四品大堪布連札
薩克名號策忍汪曲曾授台吉噶布倫連東科爾著卽一併斥革

並著恩麟德泰派撥番營官兵將該犯等拏獲會同達賴喇嘛訊
明確供定擬具奏該犯等既經糾集僧俗意圖抗拒恩麟等尤當
妥爲彈壓一面嚴拏首要各犯一面解散脅從以免滋生事端另
摺奏遵查達賴喇嘛下山嗒經援案聲明等語本年達賴喇嘛親
至大招嗒經攢招爲國祈福忱悃可嘉著發去黃哈達一箇銀曼
達一箇鈴杵一分菩提念珠一串玉碗一箇玉盤一箇黃段二卷
交恩麟等轉給達賴喇嘛祇領用昭恩賚將此由四百里各諭令
知之○己巳諭軍機大臣等左宗棠穆圖善豫師奏陝回勾結西
甯回族滋擾派兵堵剿一摺陝回分竄西甯攻撲高寨威遠等堡
擾及高羌堡董家寨一帶經總兵黃武賢派隊堵剿疊獲勝仗惟
逆首白彥虎率黨攻陷小南川漢堡爲巢穴崔三一股仍踞曹家
堡分黨潛伏高寨禹生彥股眾與爲犄角並有金積堡敗匪竄至

與西甯回民聯爲一氣河州回目馬占鰲等亦率撤回攻陷民莊
西甯回族就撫本不足恃見在外匪紛至與之勾結勢恐蔓延穆
圖善見已檄令黃武賢率領三營會同豫師原駐威遠營勇調集
西碾各路團丁相機進擊卽著督飭派出兵團認真剿辦毋任賊
勢鴟張西甯地方賊股充斥豫師兵力旣單穆圖善駐省各營勢
又不能遠調左宗棠當統籌全局迅卽撥隊馳往助剿痛掃妖氛
其應如何籌辦布置並見擬進紮何處河州回巢應如何分路進
兵攻剿均著詳細具奏赴湟道路雖梗豫師仍當設法剋期前進
不得濡滯中途以重職守穆圖善另片奏未能撥兵兼顧西路等
語甘省北路雖漸肅清而敗殘餘匪竄向河州西甯等處陸續由
甘涼遁入肅州若左宗棠進兵規取河州賊勢窮蹙必以西路爲
逋逃藪自應添撥兵勇扼守西路方足制賊死命穆圖善所部保

守省垣護運糧石未能移調前往自係實在情形甘涼兵力過單難資扼剿左宗棠統轄全省西路應早籌及仍著迅速撥兵協剿毋得稍涉遷延致滋貽誤穆圖善亦應督率近省各軍隨時抗剿竄匪與左宗棠和衷商辦不可稍分畛域左宗棠穆圖善另摺奏剿辦山丹土匪及甘州賊股情形已明降諭旨將出力及畏縮各員分別獎勵懲辦矣仍著左宗棠等飭令楊占鰲督率所部加意防範毋令賊匪乘間奔突以靖地方將此由五百里各諭令知之○庚午諭軍機大臣等曾璧光奏剿辦永甯等處賊匪情形一摺貴州官軍由盤江以北進剿疊破永甯鎮甯歸化賊巢克復募役司汛城並攻破郎岱水城各崗寨盤江以北雖無賊蹤難保該逆不乘隙回竄復肆蔓延曾璧光等見調總兵何世華督率八營防守盤江北岸卽著飭令該總兵嚴密布置認真防守毋令再行擾

及北岸以免復煩兵力曾璧光等見調鄧有德鍾有思等馳赴下游分路進兵著檄飭派出各軍分路進規麻哈清平等處轉戰而前節節掃蕩以期次第廓清李高腳一股竄粵境後見在剿辦如何著馮子材康國器懷遵前旨飭令孔憲隆等會合黔軍迅將此股殘匪悉數殄除此時黔軍進攻麻哈清平等處苗逆兵力尙恐不足馮子材等能否騰出勁旅越境助剿之處著卽酌度情形相機調派不得稍分畛域將此由五百里諭知曾璧光馮子材並諭康國器周達武知之○諭杜嘎爾奏賊匪東竄派隊追剿一摺據稱賊於五月十七日經過圖固里克臺站在蘇倫巴咱爾游牧地方盤踞旋即東竄寨莫得庫等處嗣又竄向莫霍爾嘎順臺站與文盛張廷岳等先後奏報大略相同該逆由阿爾泰軍臺向東竄走距察哈爾不過千餘里正宜乘其竄近合力兜剿杜嘎爾已令

訥蘇肯帶領官兵與庫倫派出喀爾喀各隊會合進剿並派西勒興阿會同吉勒洪額所帶之兵向東迎擊著卽催令各隊星速前進探蹤截剿文盛前派察哈爾左翼官兵五百名在軍臺要路安營並令大同兵暫紮防堵此時賊踞臺站不遠著文盛慶春飭令迎頭遇截務期與杜嘎爾所派之兵兩面夾擊就地殄除該匪駸駸東向難免不覲覲庫倫著張廷岳阿爾塔什達督令派出各隊實力追剿並嚴檄附近防兵確探嚴防毋稍大意薩薩布前次進剿洪庫勒塔拉踞匪曾否蕝事著定安催令迅速取道前赴濟斯洪果爾一帶相機兜剿以顧糧運毋稍遲緩杜嘎爾見在催調駝馬並在附近雇覓駝隻應用著俟辦理就緒卽行統帶官兵剋期進剿其哈爾尼敦一帶應如何畱兵扼紮以顧烏庫門戶仍著懷遵前旨妥籌辦理刻下臺路梗阻糧運遲滯若不迅籌疏通兵食

必致缺乏關繫非輕著杜嘎爾飭令伊勒和布會同賽爾烏蘇管站官玉和將臺站失散人眾趕緊收集並著文盛慶春將布魯圖屬各臺一律設復並將各軍糧餉催趨運解以資接濟將此由六百里各諭令知之○永定河溢○予貴州陣亡參將張晉成祭葬世職○甲戌諭軍機大臣等劉崐奏剿除雷公山踞逆埽蕩附山各寨一摺湖南援黔官軍自攻克丹江凱里後乘勝進取連克南刀大塘堪洞各賊巢徑趨雷公山立平雷公坪並克九眼塘燕子窠等寨直登山頂縱橫盪決殲賊千數百名雷公山境肅清惟逆首張臭迷率賊數百竄逸該逆糧盡黨散勢已窮蹙著劉崐飭令席寶田督率將弁跟蹤追捕迅速弋獲以除巨患並派隊由螃蟹等處轉戰而前廓清大道俾無梗阻貴州各軍已將上下江收復調隊進次都勻麻哈之間與楚軍相距不遠著曾璧光周達武檄

催派出將領會合楚軍迅將逆苗次第殲除以靖黔疆此次在事出力人員著劉崐暫行存記俟苗疆肅清再行彙請獎勵將此由五百里諭知劉崐曾璧光並傳諭周達武知之○予貴州陣亡遊擊劉得勝祭葬世職○乙亥諭軍機大臣等楊昌濬奏查辦嚴州齋匪情形一摺浙江衢嚴二府界連江閩時有齋匪涸迹本年四月間壽昌縣地方謠傳外來匪徒暗中勾結滋事經該縣督團緝獲徐保洪包繕幅二名五月初八夜間復有匪徒突入嚴州府城卽經該處文武派兵擊勦擒斬多名立將城內餘匪及城外匪黨搜捕訊據賊供此股匪徒係江西鉛山縣人李懷東起意劫犯搶掠首先進城已被陣斬其逃散之匪亦經先後拏獲並訪獲積年齋匪頭目周惲良卽朱葛亮等地方一律肅清辦理尙爲迅速嚴州府屬文武各員本有應得處分姑念事起倉卒登時撲滅功過

尙足相抵著免其置議其奮勇勦賊受傷之副將黃中理著交部從優議敘齋匪出沒靡常實爲地方之害楊昌濬仍當檄飭派出各員會同各該地方官督率團練隨時稽查遇有不法之徒三五成羣形迹可疑者立即躡拏從嚴懲辦此股人數究有若干窩聚究在何處江西福建與浙江毗連處所尤易藏奸著文煜王凱泰劉坤一楊昌濬一體飭屬確查悉數兜拏毋任匪黨藏匿鉛山等處匪徒疊經諭令劉坤一督率所屬實力搜捕該撫務當懷遵前旨飭令所屬各員認真辦理務將該匪黨與訪拏淨盡以絕根株將此由四百里各諭令知之○諭李瀚章郭柏蔭奏拏獲穀城縣謀逆匪徒並湘省龍益匪黨肅清等語湖北穀城縣匪徒葉子午等商同逸犯蔡凌漢招集河南夥黨約期滋事經該縣知縣宋熙曾訪獲並起出謀逆書信等件著李瀚章等飭令審明後卽將各

犯就地正法並勒限緝拏逸犯蔡淩漢等務獲淨盡嚴辦該逆既有招集河南夥黨滋事之語著李瀚章等知照李鶴年飭屬訪查如有匪徒潛謀勾結卽行嚴拏懲治郭松林見回襄陽著知照該提督將各軍扼要駐紮安爲彈壓湖南龍益滋事會匪雖經剿散伏莽尙多該督撫務當督飭各該州縣力行保甲認真稽察以期消患無形不得以見已撲滅稍形疏懈匪首劉道美劉貫三何春台等曾否殲斃著劉岷懷遵前旨嚴密躡緝斷不准任令漏網將此由四百里各諭令知之○丙子諭軍機大臣等李鴻章奏口外臺站潰散糧運阻滯請飭迎提保護安定奏撥隊探剿檄調馬隊進紮臺路慶春奏設復臺站情形派兵赴臺防剿杜嘎爾奏酌配調到駝隻帶隊啟程各一摺杜嘎爾於圖謝圖汗部落解到駝隻後卽抽調官兵三百餘名親自統帶啟程偵探賊蹤向東南進剿

並飭吉爾洪額訥蘇肯迅速前進一體探剿卽著該副都統督飭各軍視賊趨向實力夾擊毋得再涉遲延致令匪蹤紛竄至駐紮哈爾尼敦各隊調出千有餘名存營官兵無多而餉銀十餘萬兩尙在烏訥格圖站收存杜嘎爾務當嚴飭達爾濟等於推河等處要隘嚴密防守以保糧餉喜喇穆呼爾等臺雖已設復大半惟默霍爾噶順霍尼齊二臺又被賊擾且探有分犯庫倫多倫諾爾之說是賊蹤駸駸東竄距察哈爾不過千餘里慶春當飭前調察哈爾官兵迅卽啟程前進探蹤迎剿與杜嘎爾等軍兩面夾擊就地殄除張廷岳阿爾塔什達仍當懷遵前次諭旨督飭官軍勤加偵探妥籌防剿毋稍懈弛臺站梗阻前敵各軍糧食恐有匱乏之虞雖經文盛檄催各臺駝馬並撥兵護送尙恐緩不濟急著杜嘎爾將二十五臺以下存積米糧派隊迎提到營接濟軍食仍酌撥隊

伍擇要扼紮以護續運之糧慶春迅將已復各臺設法保護未復各臺趕緊招集以期源源接運無誤師行其宣化官兵並著張廷岳等就近在恰克圖採辦糧石以資接濟一俟臺站疏通卽由李鴻章飭令口北糧臺如數解還庫倫至張家口糧臺既據李鴻章奏稱見山口北道就近督辦均尙妥協卽著照舊辦理毋庸另議更張前竄烏喇特旗之賊經薩薩布等派兵會剿賊向西北竄去難保不與固爾板賽一股會合擾及軍臺著定安仍遵前旨催令薩薩布督率所部剋日馳赴濟斯洪果爾一帶相機兜剿以顧糧運並令劉廷等軍聯絡聲勢會合夾擊以期淨埽逆氛賊匪究分幾股共有若干人見在究竟分竄何處除薩薩布所部曾與賊接仗外杜嘎爾所派吉爾洪額等何以終未與賊相遇著定安慶春杜嘎爾張廷岳等確切偵探實力防剿並著定安檄飭烏喇特茂

明安等旗嚴密堵禦毋任賊匪再行竄入將此由六百里各諭令知之○諭穆圖善奏各營馬步勦賊獲勝等語甘省大靖及黃崖王鵝壩山石井子等處時有竄賊搶掠軍糧及農民牲畜經薩英阿雙福等帶隊迎擊擒斬多名金縣境內竄匪亦經穆克德布會合團勇擊敗惟見值收穫夏田之際該逆肆行滋擾無非計圖飽掠仍著穆圖善督飭派出各隊分途截勦保護農田毋任肆擾河逆大股見復偷渡洮河鞏昌安定徽縣等處均有賊蹤該處入省大路時通時塞秦州運省餉銀軍火亦尙滯中途安定迤西之車道嶺等處爲糧運要路游匪出沒防不勝防穆圖善所部不敷分布亦係實在情形左宗棠當酌撥勁旅前往助勦力圖兼顧穆圖善仍就見有兵力實力防範毋稍鬆懈其河州逆回如何籌辦及見在情形若何仍著左宗棠迅速具奏將此由五百里各諭令知

之○命瑞麟爲大學士仍畱兩廣總督任○予甘肅陣亡參領德住祭葬世職○戊寅吏部左侍郎胡肇智卒予祭葬○己卯諭內閣前因鄭親王承志於指使糾毆福珣被扎身死一案任意狡展當將承志革去王爵仍令管理宗人府王等軍機大臣會同刑部嚴行審訊茲據審明分別定擬具奏此案兇犯馬三聽從玉壽糾邀將福珣毆扎致傷身死該犯以回民因案擬軍由配潛逃膽敢於輦轂重地戕害職官實屬不法已極馬三著卽行處絞以昭炯戒已革鄭親王承志因被福珣屢次欺侮主令玉壽糾邀馬三將其毆打因而致斃承志業經革去王爵其應得杖一百流三千里罪名著照例折罰養贍錢糧一年並折圈禁二年玉壽因承志欲毆福珣復挾嫌愆憊代爲主謀致釀重案實屬罪無可逭玉壽著從重發往吉林等處交該將軍安插德祿在已革鄭親王承志府

內管事明知承志與玉壽謀毆福珣並不勸阻仍與玉壽商謀且屢次抗傳到案時復捏詞搪塞亦屬狡詐德祿著杖一百徒三年奕烺聽從玉壽兩次代爲展轉糾人復幫同馬三攔截福珣車輛亦屬不安本分奕烺所犯杖六十罪名著照例實行責打其應得徒一年罪名照例折圜禁半年此次拏獲兇犯馬三之派出員弁著步軍統領衙門酌量保奏至所遺和碩鄭親王爵著宗人府照例揀選承襲○諭軍機大臣等李鶴年奏皖匪闖入豫境派隊擊散並拏獲多名正法一摺安徽阜陽縣匪徒三十餘人攜帶馬匹洋槍闖入河南沈邱項城交界之樹王村經署沈邱縣知縣秦本提會同參將玉壽等拏獲李金聲等數名復有匪徒吳老淵等百餘人突入汝陽縣小宋寨意圖擾掠該署知縣張其昆參將柏英等帶兵會拏立斃數十人陣斬匪首石景沅生擒匪首石倚子並

經新蔡縣知縣管煥酥派勇追獲匪首王拉等十數名餘匪竄回
阜陽豫境一律安堵阜陽華莊姜寨一帶聚匪究有若干匪首何
人英翰何以未經奏及著嚴檄該地方文武實力搜查悉數捕獲
毋得養癰貽患其吳老淵王狗頭二名在逃未獲著英翰李鶴年
飭屬一體會拏務須按名弋獲淨絕根株以靖地方李鶴年見檄
令李家昌王壽等分紮校巡著督飭該員弁會同地方官實力接
捕毋稍疏虞前據李瀚章郭柏蔭奏拏獲穀城縣匪徒葉子午等
供有商同逸犯蔡淩漢欲招集河南夥黨約期滋事之語當經諭
令知照李鶴年飭屬查拏仍著該撫嚴飭所屬於毗連湖北各州
縣地方認真訪查如有匪蹤潛匿立即嚴拏懲辦以杜亂萌將此
各諭令知之○調劉長佑爲廣西巡撫以張兆棟爲廣東巡撫蘇
鳳文爲漕運總督

由廣西巡撫調

○庚辰諭軍機大臣等昨有旨將劉長

佑調補廣西巡撫該撫謝恩摺內本有取道廣西前赴廣東新任之語著於接奉此旨後迅赴桂林省城接印任事仍毋庸來京請訓廣西地方遼闊伏莽甚多南太泗鎮等屬尤爲盜賊淵藪其附近越南邊境時有匪徒滋事叛服靡常若非封疆大吏振刷精神極力整頓不足以綏靖邊圉劉長佑素嫻軍旅前任廣西巡撫有年情形熟悉此次棄瑕錄用正當激發天良力圖報稱該撫到任後於察吏安民及勦辦土匪一切事宜務須認真籌辦毋稍因循馮子材見在帶兵勦辦越南竄匪劉長佑當與和衷共濟以期迅速蔽功將此由五百里諭令知之○辛巳以廣東盜賊肆行諭瑞麟飭屬嚴緝○壬午左宗棠奏竊臣前將河州零賊出竄南路各軍節節勦捕情形馳陳旋據總統南路諸軍道員周開錫稟報各軍戰狀大略相同惟前此竄賊雖經勦滅殆盡而後路運道所關

周開錫猶慮西禮微成深山窮谷尙有伏莽未除飭令總兵蘇家良等各率馬步分途按剿四月十三日蘇家良等訶知成縣屬任家莊山頂有賊竄匿遂改騎爲步圍之忽一賊自賊中提首級一顆跪陣前乞降蘇家良訊之自稱姓海名富兒所提首級則所殺小頭目查老五也查老五本陝回楊生公所部悍賊上年崔三等逆敗後楊生公潛赴提督傅先宗軍營求撫行至中途事覺爲崔三所殺餘眾復欲就撫又爲查老五所阻茲海富兒憤其屢梗撫議遂斬之以降蘇家良受之海富兒並呼願投誠者三十人呈繳旗幟伏地求撫其不願投誠者約尙八九十人仍偃蹇如故蘇家良等率隊猛撲皆中礮墮崖死無一脫者遂收降回海富兒三十人以歸點驗降人大半籍隸陝西年力精壯當飭令安插隊伍中充餘丁立功自贖緣蘇家良以良回積功擢至總兵所部本回騎

也階州山谷叢雜最易藏奸向有緝匪一種據險爲巢時出肆掠爲地方患署知州洪惟善訪有段世才瞿煥周李奎者均積年渠惡自恃險僻已甚白馬關雖有官軍分防無如何也前此逆回闖入白馬關時段世才乘隙擄搶三月初二日回逆敗竄洪惟善飭楚勇哨長副將彭德沅會商守備周正秋率隊合力圍攻段世才匪巢並派哨往扼李奎洞口與小關嶺兩處另募卡勇六隊分紮距州城百八十里之太石山三十里之兩水里以防外寇一面派役訪拏著名匪徒褚正武黃萬明等防其勾結爲患知會白馬關州判烏堯松阿集團協剿嚴防竄逸布置既定彭德沅等於三月十二日偪近匪巢駐營出隊攻巢巢中礮石雨注迄不能下二十五日併力攻破頭卡立斃匪等十餘名餘黨縮退二卡拚死抗拒官軍據其頭卡以擋牌護劈山礮向二卡連番轟擊賊不能支是

夜五鼓遂率其黨繞巖潛遁官軍燬卡而入起獲大礮三座擡槍六桿小槍二十三桿其扼李奎洞口之哨勇亦於是日攻破李奎巢穴生擒匪首李奎李俊張昭蒲煥軍楊仕得等五犯烏堯松阿亦拏獲匪首段世才之母段楊氏及其雇工鞏正明夥犯李毛娃之父李應收訊明後當將李奎李俊張昭蒲煥軍楊仕得五犯就地正法餘均分別省釋惟段世才尙未就縛洪惟善詞知該匪逃匿瞿煥周所據之名崖洞內地勢尤險四月二十一日派縣丞李芝瑞率隊掩捕是日抵瞿家溝分路進攻連破數卡斃匪二十餘名比官軍攻擊達旦忽洞中喧嚷聲起均向洞左深林行走李芝瑞知賊潛逃揮所部突入匪眾滾崖跌斃與槍矛擊刺斃命者約二十餘名生擒段世才之父段明德段世才之妻段李氏餘匪王三胖子蒲友娃子王偽元帥等數名又沿途追斬二十餘名當將

王三胖子王僞元帥蒲友娃子訊明正法惟段明德一犯及段李氏暫畱未誅訊據擒賊供稱段瞿兩逆已於是日四更時縋巖遁走段世才有赴陝西畧陽漢中之說瞿煥周則擬赴四川廣元縣臣得報後當卽分別咨行四川陝西轉飭所屬一體協緝以淨根株又奏竊甘肅回亂雖由陝回構衅牽連而起實則新教久懷不軌卽無陝回牽連而亦不能保其不變適因漢回結怨得所藉口以迫脅其族類其變乃益速時值東南兵事方殷重兵鉅餉難於分布不得不勉事羈縻而玉關內外竟無完土矣茲幸 皇威震疊金積蕩平陝回窘蹙歸誠又經畫地安插朝廷仁育義正之懷天下共喻回民雖善詐多疑自忖黨堅耐戰孰如陝西堡寨之密槍礮之多孰如金積其不敢妄肆鴟張固意中事也春間清水縣張家川撫回李得昌自請赴河州諭撫馬尅大馬占鼐臣知爲州

回央託而來諭令聽其自投不准招致蓋自行投首准與不准官
操其權苟由招致而來設有不可撫者礙難處置一涉操切轉無
以示大信而服其心也李得昌行至洮河東岸馬尒大等遞呈求
撫適聞河西用兵心懷驚懼疑李得昌之給己李得昌亦疑撫局
有變忿懼而歸嗣西路各郡縣見蕩平金積緣起告示又探知靈
州平涼固原化平川等處安插陝甘各起回民安居耕墾適然無
驚始悟撫局終無可疑馬尒大馬占鼇求撫之心乃益切觀其於
李百寬馬彥隆等投入河州時拒不容畱亦可概見此時言招撫
固可省兵力而速戎機然以地勢言之河州西甯卽漢唐河湟故
地爲歷代戰爭之場蘭州東西南三面均緊連河州河州賊氛不
靖蘭州不能解嚴以賊勢言之河回嗜利輕生性喜剽掠無事時
卽常騎馬遠出鈔掠變亂十年未受懲創更無畏忌此等嗜亂之

民非創鉅痛深固難望其永久帖服也見在甯夏平涼慶陽涇州鞏昌秦州階州各屬大致實已肅清販撫耕墾安插遷延兵屯民屯善後諸務實已具有端緒雖中衛鹽固一帶時有游匪出沒不常甘肅之徽兩西禮等縣亦時有伏匿之匪伺劫運道然統計實不過數起人馬多者實不過數百少者僅數十而已倏隱倏見如蟲蝨著體殊費爬按然固無能爲害見擬畱黃鼎雷正綰魏光燾左日升等各營自中衛至平涼扼要分駐其南路徽兩一帶加派提督殷華廷馬隊護運接緝游匪一面慎選地方官會同各防營嚴密掩捕以淨根株而重後路據各路稟報浮橋渡船已辦各營芻糧軍用廳備道路修治已平乃檄各將領剋期會師而前進規河州記名提督涼州鎮總兵傅先宗率所部馬步由狄道進以其半渡洮而西修立堅壘以其半駐洮東岸爲中路記名提督楊世

俊率所部馬步隊及提督張仲春宗岳馬步隊取道南關坪進峽城爲左路記名提督劉明燈由馬營監進紅土窯由紅土窯進安定縣埽除零匪以扼康家崖之要記名提督徐文秀由靜甯州進會甯繼之爲右路俟中路渡洮之師修壘畢左右兩路乃渡洮繼進其岷州及洮州廳地居河州西南山徑叢雜以五營分駐兩城調土司楊元帶番勇守隘口相機防剿統歸楊世俊調遣會甯西北安定東北均接靖邊縣地境當北竄之衝檄黃鼎分所部步隊八營益以副將桂錫楨馬隊三營歸記名提督徐占彪統領由中衛進靖遠南接會甯安定游匪西顧蘭州臣俟諸路布置略定卽率親兵由隆德赴靜甯安定督剿俟河州大定乃圖西甯也西甯著名逆首馬尕三已於三月內自伏冥誅陝西崔三禹得彥白彥虎等逆近時兇餒頗形消阻至甘州涼州肅州本無大股耐戰之

賊惟未覩兵威故爾時形倔強如果鋤其桀黠寬其良愿辦理悉當人心則勦足令其畏撫足令其懷自可永期安謐臣惟殫誠盡瘁慎以圖之上諭軍機大臣等成縣任家莊匪經總兵蘇家良按勦投誠者三十人著左宗棠飭令蘇家良妥爲安插毋令再滋事端此外有無伏莽仍著認真搜捕無畱餘孽階州綰匪經副將彭德沅等率團圍攻疊破賊巢惟段侍才瞿煥周在逃未獲該大臣當飭彭德沅等實力查拏盡法懲治賊供既有段逆赴陝瞿逆赴川之說著左宗棠咨照吳棠蔣志章飭屬一體協緝毋稍漏網中衛鹽固一帶時有游匪出沒徽兩西禮等縣亦有伏匪伺劫運道左宗棠卽飭派出各軍嚴密掩捕以淨根株見在該大臣規取河州分中左右三路進兵布置尙屬周密左宗棠擬赴靜甯安定督勦卽著督飭傅先宗等軍分道前進實力掃蕩毋任河州逆

匪日久盤踞惟河州一經進兵恐該逆被剿窮蹙句結西甯回眾紛竄甘涼等處該大臣於西路一帶尤宜妥籌兼顧以免匪勢蔓延巴里坤鎮總兵員缺既據左宗棠奏稱趙德正尙爲相宜卽著飭令迅赴署任仍隨時察看如不能勝任卽行奏請撤換劉錦棠見在請假回籍並將傷病弁勇遣撤另行募補著飭令到籍後認真挑選假滿卽行回甘以資得力其所畱各營分駐金積靈州等處卽飭蕭章開等妥爲鎮撫前由金順遣回靈州回民當諭左宗棠飭令劉錦棠黃鼎遇此項回民抵籍札行地方官箝束安置見在辦理是否完竣著左宗棠查明具奏將此由六百里諭令知之

○左宗棠奏臣前調提督劉明燈一軍進駐馬營監轉搬軍糧以規進取據報五月二十日親督所部各營隊伍護送由秦州運濟蘭省軍火並擬便道接剿零匪途中訶知先夜四更時有賊數十

名襲據通渭安定隴西交界之李家溝廢堡劫掠糧畜當派正中右後三營隊伍分途馳剿僅畱前左副中三營隊伍護送軍火旋據各該營官回報軍抵該處賊已遠颺居民均已歸堡二十二日將軍火交替接護前進二十四日率隊回防當據花鼓樓堡民報稱隴西屬之八里灣有竄賊馬步數百名意圖攻堡劉明燧當派正中營總兵王前程率正中營步隊及參將楊正茂西征馬隊馳往援剿是夜三更後步隊先抵距花鼓樓二十里之張家堡詢知賊伏深峽溝廟內王前程當令各哨卽夜圍攻乘其不備四鼓衝枚疾進黎明步隊悉已抵廟前賊倉卒出敵官軍槍礮齊施刀矛並進立斃賊七十餘名生擒十四名賊悉棄械狂奔官軍乘勝追殺斃尾賊四五十名前賊回顧追兵甚緊倉卒間躍避土洞以圖苟免官軍結繩放下擬繩出斬之殊賊固匿不出僅一人附繩而

上訊係義岡川漢民吳香香子據供賊匿土洞者約尙有八九十名知縋上必死希俟官軍收隊再出也官軍計無所施乃傾土石入洞中但聞洞中號呼之聲甚慘迫填厚約數尺許聲止而賊已絕矣復追搜餘賊行十餘里不見蹤迹始收隊回防提訊獲賊據供此股頭目馬老五本鞏昌回民上年逃入河州五月初六日始由康家崖竄出其西山游匪據提督周紹濂稟稱五月二十日後營總兵周玉林率步隊及王鑑萬馬隊按山至駝廠堡小有斬獲六月初一日搜至臭蒿灣斬賊數十名生擒逆目田如貴等四名訊知田如貴本馬化澂之戚屬五月十五日甫由河州竄出意圖勾結黨夥劫掠糧運斬之左營管帶官總兵李良穆稟稱六月初二日黎明訶有騎賊二百步賊七八十名由後河竄至官軍整隊迎擊陣斬步賊二十餘名騎賊中礮落馬者甚夥賊敗竄後河官

軍跟迹緊追賊分十餘起拚命衝突官軍隨賊所向擊之適大風捲地雨雹交作賊悉由北路竄出比雹止復追則賊去已遠五月十九日魏光燾飭前營副將魏紀鑒拔捕趙家塬踞匪擒斬回目馬得魁等十餘名二十一日後營副將鄭連拔擊賊中田溝斬賊十餘名六月初二日賊目馬彥濫所裹良回楊保俊手刃首戕馬柏森之賊馬成禮並帶同馬勇十八名赴總兵于奇泮營前乞撫受之見正飭各軍上緊按捕各起零匪計可漸次肅清報聞○以常恩爲刑部右侍郎由內閣學士遷○癸未諭軍機大臣等金順奏部署起程並請飭催協餉一摺包頭爲赴烏必經之路該將軍擬將所部全隊帶往該處簡拔精銳部署赴烏著俟行抵包頭後將應需餉項及採買轉運各事宜悉心籌畫趕緊啟程一面具摺奏聞副將詹恩科帶隊追剿竄匪曾否遇賊接仗近據杜嘎爾張廷岳等

奏前竄二十五臺霍呢齊之賊見向西南奔竄該匪股數不一奔突靡常該將軍啟行後卽當派隊遠探沿途遇有賊蹤相機截剿掃蕩逆氛至所稱該將軍積年餉需缺乏包頭後套等處欠發糧價甚多且赴烏官軍裹帶行糧亦須籌給款項等語所奏自係實在情形見在北路軍情緊要該將軍帶隊前進必須速籌鉅款方能成行著何璟將積欠軍餉趕緊籌撥銀三十萬兩解交金順應用其河東辛未綱應協銀十八萬兩並著一併掃數籌解俾資開放何璟素顧大局務當協力籌畫不得稍涉延宕致誤軍行將此由五百里各諭令知之○乙酉有流星出天市垣○丁亥 今上皇帝生○戊子以孟秋時享 太廟 上前期親詣行禮○允李鴻章請截留江浙奉天漕米十萬石賑濟天津被水災民